

Lita Iipuru Tjutakutu Iyantja

Hebrews

Nyangatja Nganmanytju

Nyakula Wangkanytjaku

Putula kulini nganalu walkatjunu tjukurpa nyangatja, panya ini kuranyu ngaranytja wiya Paulaku lita tjuta purunypa. Palu nintipuka tjutangku kulilpai tjinguru Paanapatjalu walkatjunu, munta tjinguru Apalatjalu, munta tjinguru Tjaalatjalu walkatjunu.

Panya Jesunya malaku ilkarikutu ankunyangka palumpa nintintja tjutangku Tjukurpa Palya Jesuku para-tjakultjunangi anangu Israelkunu Jew tjutangka. Kaya tjara mulamularingu Jesuku munuya palumpa walytjaringu. Kaya palunya tjananya wangkapai alatji, *Jesuku walytja Iipuru tjuta*, panya tjanampa wangka Iipuru. Kaya Jew kutjupa tjutangku mulamularingkunyitja wiyangku wantingi panya paluru tjana Moseku tjukurpa kutju pulkara kulilpai Jesunya wantira.

Munuya paluru tjana Jesuku walytja Iipuru tjuta pulkara kuraningi Jesunya wanannyangka, munuya pulkara mukumukuningi tjananya malaku pitjanytjaku tjanalakutu. Kaya Iipuru kutjupa tjutangku tjinguru kulinigi tjanala munuya nguwanpa malaku anangi ara panya nganmanyitjangka piruku nyinanytjikitja.

Ka pala palulanguru tjukurpa nyangatja wati kutjupangu kulira walkatjunu tjanampa tjananya kunpuntjikitjangu Jesunya wantinytja wiyangu tungun-tunguntu wanantjaku. Paluru alatji tjanala wangkangi lita nyangangka,

“Ara nganmanyitja panya Godalu Mosenya ungunytja, nyara paluru unytju ngarangi munu putu anangu tjuta palyanangi tjana Godala mirangka tjukaruru ngaranytjaku. Palu Jesunya pitjangu munu punu katakutjarangka ilura palumpa milkali tjutira ara kutjupa palyanu kuwaritja, ara panya nganmanyitjanga waintarinytja alatjitu. Ka ara nyanga palunya wanannyangka kutju Godalu nganannya palyalku palula mirangka tjukaruru ngaranytjaku, nganana Jesuku mulamularingkunyangka.”

Ka lita nyangangka ngaranyi tjukurpa nganana kulu kulintjaku panya Jesunya pulka mulapa uwankarangka waintarinytja, ka iwara panya paluru alantja nganana Godala wirkankunytjaku wiru mulapa ngaranyi iwara kutjupa tjutangka waintarinytja.

Tjukurpa nyanganpa ngarinyi:

1:1—2:18 Angelpa tjuta palya, palu Godaku katja pulka mulapa tjanala waintara.

3:1—4:13 Mosenya palya, palu Godaku katja pulka mulapa palula waintara.

4:14 —7:28 Jesunya tjukurtjara pulka nganampa nyinanyi kutjupa tjutangka waintara alatjitu.

8:1—9:22 Godalu Jesulawanungku kalkuntja

pulka mulpa ngaranyi Moselawanungku
kalkuntja purunypa wiya.

9:23—10:18 Christanya nganampa ngalkilpa
ilura milkali tjutinyangka kutju Godalu
nganananya kura tjuta palyantjtjanguru ka-
lypangku wantipai

10:19-39 Palulangurula uti raparingkula Go-
dala ilaringkula palula titutjara tjungu ny-
inama

11:1-40 Nganmanyitja tjutangku nganananya
nintintja Godaku rawa mulamularingkuny-
jaku wantinytja wiya alatjtu

12:1-13 Godanya nganampa mama nyinanyi
munu nganananya tjukarurulpai.

12:14-29 Godanya kulira wantinytjaku-tawara

13:1-8 Anangu kutjupa tjuta mukulyangku
wirura kanyintjaku

13:9-19 Tjukurpa kurakura tjuta ngunti
wangkara nintinnyangka kulira
wantinytjaku

13:20-25 Tjukurpa malatja

Godalu Ngananala Wangkangu Palumpa Kat- jawanungku

¹ Uwa, nganmanyitju Godalu wankatjara
tjutawanungku wankangi tjamula tjanala.
Paluru tjuta-arangku wankangi wankatjara
kutjupa kutjupangka, tjukurpa kutjupa kutjupa
tjuta. ² Palu kuwari nyanga tjuntu malatja
ilaringkunyangka Godalu ngananala wankangu
palumpa katjawanungku. Panya palumpa
katja kuwariptjara mulpa nyinangi palula
tjungu munu pula tjungungku uwankara

palunu ilkar_i, manta kul_u. Ka katja palunya Godalu wangkara tjunu uwankara mulapa mayatjangku kanyintjaku. ³ Godanya panya wiru mulapa nyinanyi pitalytji pulkanya, ka paluru pitalytji nyanga palunya ngananala nintini panya paluru Mama purunypa alatjitu nyinanyi, wiru mulapa. Munu paluru manta ilkar_i uwankara tjukarurungku kanyini witulya pulkangku. Munu paluru nganampa ngalkilpa ilungu Godalu nganananya kura tjuta palyantjijanguru kalypangku pungguwiyangku wantinytjaku. Munu panya palula malangka paluru ilkar_ikutu ankula Godala witulya pulkangka tjunguringkula mayatja pulkatu nyinanyi.

⁴ Uwa, paluru angelpa tjuta purunypa wiya. Panya Godalu palunya angelpa tjutangka wain-tara tjunu pulka mulapa. Munu angelpa tjuta pulkanmankunytja wiyangku palunya kutju katjanmankula tjunu mayatja pulka. ⁵ Panya nyiringka iriti walkatjunkunytja ngaranyi Godalu wangkanytja nyanga alatji,

“Nyuntun ngayuku katja, kana nyanganguru nyuntunya titutjarangku katjanmankuku.” *

Ka nyangatja wanyu Godalu angelta wangkangu? Wiya, Godalu angelta nyanga alatji wangkanytja wiya. Palu palurunku palumpa katja kutju tjakultjunangi Jesunya. Godalu Davidala iriti wangkangi nyanga alatji,

* 1:5 Psalm 2:7

“Palatja ngayuku katja, ka ngayulu palumpa
Mama.” *

Ka nyangatja wanyu Godalu angelpa
tjakultjunangi Davidala? Wiya, paluru angelpa
wangkanytja wiya, palurunku palumpa katja
wangkangi.

⁶ Panya palumpa katja kutjukurutja
mantakutu iyantjikitjangku kulira Godalu
wangkangu alatji,

“Angelpa uwankarangkuya kulinma munuya
nyanga palunya walkunma.” *

⁷ Palu nyaa wanyu Godalu angelpa tjuta
wangkangi? Wiya, iriti panya paluru
wangkanytja nyiringka ngaranyi tjukurpa
nyanga angelpatjara alatji,

“Panya Godalu angelpa tjuta witulpai kutjupa
kutjuparira palumpa warakarinytjaku,
panya walpa purunyarira munu waru tili
purunyarira.” *

⁸ Palu tjukurpa kutjupa ngaranyi Godalu
palumpa katja wangkanytja nyanga alatji,

“Nyuntun mayatja pulka mulapa munun nyun-
tumpa anangu tjuta titutjarangku kany-
ilku wiyaringkunyitja wiyangku.

Nyuntu tjananya tjukarurungku kanyilku
kurara kanyintja wiyangku.

⁹ Munu tjana tjukarurungku palyannyangka
kutju nyuntu pukularipai palu kura
palyannyangka nyuntu putu pukularipai.

Ka panya nyara palulanguru nyuntu
tjukarurungku kulinnyangka Godalu

* **1:5** 2 Samuelku 7:14 * **1:6** Psalm 97:7 * **1:7** Psalm 104:4

nyuntunya nganmanytju mayatja pulka
mulapa tjunu panya nyuntumpa malpa
tjutangka waintarinytjaku,
kan pulkara pukularinyi.” *

10 Ka tjukurpa kutjupa ngaranyitu nyanga alatji
Godalu wangkanytja,

“Mayatja, nyuntun kuwaripatjara mulapa
uwankara wiyangka manta ilkari palunu,

11-12 Ka panya ngula manta ilkari wiyaringkuku,
palu nyuntu wiyaringkunyitja wiya
titutjara alatjitu nyinaku.

Wanyu kulila panya mantara anangitja
anangungku rawangku kanyinnyangka
katakatiapai ka araltjara wanipai munu
kuwaritjanga tjarpapai.

Palu purunypa manta ilkari ngula wi-
yaringkunyangka nyuntu ilkari kuwaritja
manta kuwaritja tjunkuku.

Palu nyuntu kampa kutjuparinytja wiya pa-
nya palurutu alatjitu rawa nyinaku wi-
yaringkunyitja wiya.” *

Alatji nyiringka iriti walkatjunkunyitja ngaranyi
Godalu tjukurpa Jesunyatjara wangkanytja.

13-14 Uwa, mulapa Godalu angelta wangkanytja
wiya mayatjarinytjaku, palu palumpa katjanga
kutju wangkangu nyanga alatji,

“Pitja munu ngayula tjunguringkula mayatjari,
kana nyuntumpa mirpantju tjuta tjarulku,
ka nyuntu tjanala waintarira mayatja pulka
mulapa nyinaku.” *

* **1:9** Psalm 45:6-7 * **1:11-12** Psalm 102:25-27 * **1:13-14**
Psalm 110:1

Uwa, nyangatja Godalu palumpa katjangka wangkangu. Ka angelpa tjuta wanyu nyaa? Wiya, tjana kurunpa tjuta nyinanyi munuya Godanya kulira walkulpai, ka panya tjananya Godalu witura iyalpai anangu palumpa walytja tjuta atunymankunytjaku. Panya anangu palunya tjananya Godalu ngula wankarrunkuku.

2

Tjukurpa Nganampa Wankakutu Mulapa

¹ Uwa, Jesunya pulka mulapa angelpa tjutangka waintara, kala uti Jesuku tjukurpa nganana nganmanytju kulintjatjanungku purkarangku kulinma watarkurinytja wiyangku. Panya nganana tjukurpa nyanga palumpa watarkurirampa Jesulanguru paturingkuku. ² Panya iriti puli panya ini Tjaniyala angelpa tjutangka Mosenya ungu Godaku tjukurpa. Ka tjukurpa nyara paluru panya tjukarruru mulapa, panya anangungku tungunpungkula tjukurpa palunya kulira wantinyangka palumpa kura ngapartji utiringu.

³ Ka tjukurpa nyanga pulka Jesuku nganana kulira wantinyangka nganampa kura pulka palu purunypatu ngaraku, panya tjukurpa nyanga paluru pulka mulapa kulira mulamularingkula wankaringkunytjaku. Palu nganana kulira wantirampa putu wankaringanyi. Panya tjukurpa wanka nyanga palunya Mayatja Jesulu-wararangku tjanala tjakultjunu, ka tjana ngapartji kulintjatjanungku ngananala

utingku ngalya-tjakultjunu kulira mulamularingkuny^tjaku. ⁴ Ka tjana tjukurpa nyanga palunya ngananala wangkanyangka Godalu miracle kutjupa kutjupa tjuta nintipukangku palyanigi witulya pulkangku, nganana nyakula tjukurpa nyanga palumpa mulamularingkunytjaku. Munu Godalu Kurunpa Milmilnga ngananala unngu tjarpatjunu, ka nganananya witulyananyi Kurunpa Milmiltu kutjupa kutjupa tjuta witulya pulkangku palyantjaku paluru nintinnyangka. Kala nyanga alatji witulyatjararingkula tjukurpa panya palumpa pulkaratu mulamularinganyi. Kala wanyu tjukurpa pulka nyanga palunya kulira wantima? Wiya, utilanku kulira wantinytja wiyangku wantima wankakitjangu.

*Jesunya Anangurira Nganananya
Purunyaringu*

⁵ Ka panya Godalu angelpa tjuta tjunkunytja wiyatu mayatjarira uwankara kanyintjaku ngula manta ilkari kuwaritja utiringkunyangka. ⁶ Palu Godalu anangu tjuta tjunu mayatjarira kanyintjaku, panya nyiringka iriti walkatjunkunytja alatji ngaranyi wati kutjupangku wangkanytja, “God, nyuntu panyan pulka mulapa, ka panya anangu tjuta minga purunypa.

Palu nyuntu tjananya ngaltunytjungku kulilpai,

Munun tjananya atunymara kanyilpai.

⁷ Panya nyuntu anangu palyanu pulka mulapa nyinanytjaku angelpa tjutangka itingka, pitalytji pulkatjara.

⁸ Munu panyan nyuntu anangu tjunu may-
atjarira nyuntu panya paluntja uwankara
kanyintjaku.” *

Panya alatji ngaranya iriti walkatjunkunytja,
kala nyanga palulanguru kulini mulapa Godalu
anangu tjunu uwankara mulapa atunymara
kanyintjaku.

Palu kuwarila putu nyanganyi anangu
kutjupangu uwankara tjukarurungku
kanyinnyangka. Wiya alatjitu. ⁹ Palu
nganana Jesunya kutju nyanganyi. Paluru
kutju mayatja pulka nyinara uwankara
kanyini. Nyara palunya panya Godalu angelpa
tjutanguru unytjungku tjarunu pula tjungu
nyinanytjatjanungku paluru anangurira
ngalkilpa ilunytjaku anangu uwankaraku.
Godalu panya mukulya pulkanguk*u* iyanu
anangu tjuta ngalkintjaku, ka panya paluru
pikatjararingkula anga-ilungu nganana kura
tjuta palyantjitjanguru. Nyara palulanguru
paluru ilunytjitjanguru Godalu palunya
pulka mulapa tjunu uwankarangku palunya
walkuntjaku.

¹⁰ Nyangatja Godalu tjukarurungku palyanu
nganananya palumpa tjitji tjuta wankaru
malakungku wirkakatinytjikitjangku. Panya
paluru kutjungku uwankara paluntjatjanungku
wirura kanyilpaingku kulira Jesunya iyanu
anangu tjutaku iwarankunytjaku Godalakutu,
tjana palumpa walytjaringkula wirkankunytjaku
palumpa pitalytjingka. Panya Jesunya
iyanu pikatjararingkula ilunytjaku, ka nyara

* 2:8 Psalm 8:4-6

palulanguru kutju paluru nganananya wankaru
 wirkakatinyi Godalakutu. ¹¹ Panya Jesunya
 nganana walytjarara walytjarara Mama
 kutjutjara nyinanyi palumpa walytja kutjupa
 tjuta kulukulu. Nyara paluru nganananya
 wankarunu kura nganampa paltjira wiyara,
 munulanya palulangurulta kunta wiyangku
 pukultu malanypanmananyi. ¹² Panya Jesulu
 iriti Mama Godala wangkangu nyanga alatji,
 “Ngayuluna ngayuku malanypa tjutangka nyun-
 tunya tjakultjunkuku.

Mununa tjana tjunguringkuyangka tjanala
 ngurur-ngururpa ngarala nyuntunya
 inkara walkulku.” *

¹³ Munu alatji piruku wangkangu,
 “Ngayuluna mulamularingkuku Godaku.” *

Munu nyangatja kulu wangkangu alatji,
 “Nyanga ngaranyina Godaku tjitji tjutangka
 tjungu,
 panya paluruni witunu tjananya atunytju
 kanyintjaku.” *

¹⁴ Godaku tjitji tjuta panya anangu nyinanyi
 iltjanpa milkalitjara. Palulanguru Jesunya
 nganananya purunypatu ananguringu
 munu iltjanpatu milkalitjararingu. Alatji
 paluru ananguringu nganampa anga-
 ilura mamu Satanga wiyantjikitja, panya
 paluru nganananya ilunytjaku kuralpai.

¹⁵ Uwa, Jesunya pitjangu nganananya
 ngalkintjikitja Satantanguru munu paluru

* 2:12 Psalm 22:22 * 2:13 Aitjayaku 8:17 * 2:13 Aitjayaku
 8:18

nganananya raparingkuny_tjaku palya_nu. Panya ngan_many_tjula mamungka kulira ngana_na ti_tutjara ngul_ringkupai ilunytjaku-tawara. ¹⁶ Palu Jesunya angelpa tju_ta ngalkintjikitja pitjany_tja wiya. Paluru nganananya wankar_runkunytjikitja pitjangu Aipur_ramaku tjamupiti malatja malatja.

¹⁷ Nyanga palunyakitja panya paluru mantakutu pitjala an_anguringu munu mantangka nyanga nyinangi an_angu alatjitu nganananya purunypa. Munu panya Godaku warkarira nganampa tjukurtjara pulka nyinangi ngaltunytju pulkanya munu paluru tjukarurungku palya_nu nganampa ngalkiltu Godalu nganananya kura palyantjitjanguru pungkunytjaku-tawara ngana_na karalyarira Godalakutu malaku ar_ring_rkunytjaku. ¹⁸ Panya mamu tju_tangku munu an_angu tju_tangku kulu Jesunya kuraringkunytjaku rawangku arkaningi, palu paluru tungunpungkula alatjitu wantingi. Nyanga palulanguru paluru nganananya nintini ngana_na palu purunypatu kura palyalwiya tungun-tungunpa nyinanytjaku.

3

Jesunya Pulka Mulapa Mosela Munkara

¹⁻² Walytja wiru tju_ta, nyangangurula uti Jesunya pulkara kulinma, panya Godalu nganananya al_tingu palula tjunguringkula nyinanytjaku. Kala uti palunya rawangku kulinma, panya palunya Godalu tjukurtjara pulka ngurkantara iya_nu nganampa ngalkilpa

paluka nyinanytjaku. Ka paluru wanganarangku Godala kulira palumpa waraka palyanu wantinytja wiyangku Moselu purunytju, panya paluru Godala wanganarangku kuliningi Godaku walytjapiti tjukarurungku kanyira.

³ Palu Jesunya Mosela waintara nyinanyi mayatja pulka mulapa, panya Mosenya Godaku walytja tjutangka tjungu nyinanyi anangu alatjitu, ka Jesunya panya palula tjanala waintara nyinanyi panya paluru anangu tjuta Godaku walytjaringkunytjaku palyanu. ⁴ Panya anangu watarku nyinara putu Godaku walytjaringanyi, palu Jesulu palyannyangka kutju palumpa walytjaringanyi. Uwa, Godalu uwankara mulapa palyanu.

⁵ Ka Mosenya panya Godaku warkaripai nyinangi munu palula wanganarangku kulira warkarangi Godaku walytja tjutangka. Munu panya tjanala tjakultjunangi alatji, “Ngula Godalu kutjupa kutjupa tjuta wangkara utilku.”

⁶ Ka panya Christanya palu purunypatu Godala wanganarangku kulira warkaripai Godaku walytjapiti atunytju kanyira. Palu panya paluru Godaku katja, ka Mosenya Godaku katja wiya wati warkaripai kutju anangu tjuta purunypa. Ka panya nganana Godaku walytjapiti nyinanyi. Munula pakuwiyangku Jesunya rawangku wanarampa titutjaralta palumpa walytja nyinaku. Utila rawa pukulpa ala-ala patara nyinama palumpa, panya palurulanya ngula ngura wirukutu katinyi. Uwa-mantu nganana palumpa walytjapiti titutjara nyinaku nyanga palunya rapangku kulirampa.

Ngura Kalkuntjitjangka Wirkara
Pakuwiyaringkunytjaku

7-8 Kaya nyangatja kulinma Kurunpa Milmilku
 tjukurpa panya nyiringka iriti walkatjunkunytja
 ngaranyi nyanga alatji,

“Nyura kuwari Godalu wangkanyangka kulira
 tungunpungkunytja wiyangu wantima.

Panya iriti pilangka nyurampa walytjapitingku
 Godala tungunpungkula kulintja
 wiyangu wantingi.

Ka nyura palunya tjananya arkalwiyangu wan-
 tima.”

9 Godalu panya wangkangu alatji,

“Panya tjana iriti pilangka rawa para-ngarangi
 kuli 40, kana kutjupa kutjupa wiru tjuta
 tjanampa palyaningi nyakula mulamula-
 ringkunytjaku.

Palu paluru tjana nyakula mulamula-
 ringkuwiyangu wantingi,
 munuya ngayunya rawangu wituwituningi
 piruku palyannyangka nyakunytjikit-
 jangu.

10 Kana palulanguru tjanampa pulkara mir-
 panaringi

mununa kuliningi alatji, ‘Nyaakuya
 ngayunya titutjarangu wantira
 kampa kutjupa kulini munu ngayulu
 wangkanyangka wanganarangu kulintja
 wiyangu wantinyi?’

11 Mununa palulanguru tjanampa mirpanarira
 mulamulangku tjananya kalkunu nyanga
 alatji,

‘Paluru tjana ngura panya ngayulu kalkun-
tjijtjangka wirkankunytja wiya alatjitu
ngaraku ngayula tjungu nyinara pakuw-
yaringkunytjikitja.’ ” *

¹² Walytja wiru tjuta, pulkarayanku
nyangama munuyanku atunymanama.
Tjinguru kutjupangku nyuralanguru
kuraringkula kutjupangka ngunti kulira
Godalanguru paturingkuku, ka nyuranku
palula-tawara pulkara atunymanama, panya
Godanya wanka alatjitu nyinanyi. ¹³ Uti
nyuranku ngapartji-ngapartjingu wangkara
kunpunma kura ngunti kulira tarilarantjaku-
tawara, panya kurangku nganannya ngunti
kuralpai Godala tungunpungkunytjaku. Palu
rawangkuyanku kunpunma tjintu kutjupa
tjintu kutjupa ngulaku patantja wiyangku,
panya nyura ngulaku patarampa tjinguru
ngururpatu iluku tjukurta kunpuringkunytja
wiyatu. ¹⁴ Uwa, pulkarayanku atunymanama,
panya nganana uwankara Christala tjunguringu
munula titutjarangku tungun-tunguntu palunya
wanarampa nganana rawa palula tjungu
nyinaku. Panya nganana nganmanytju palumpa
pulkara mulamularingkula palunya wananingi,
palu purunytjula uti wanama ilunytjijakutu-
wangkara, munula mulapa palula tjungu
nyinaku.

¹⁵ Panya nyiringka iriti walkatjunkunytja
ngaranyi alatji,

* **3:11** Psalm 95:7-11

“Nyura kuwari Godalu wangkanyangka kulira tungunpungkuwiyangku wantima. Panya iritiya nyurampa walytjapitingku Godala tungunpungangi, ka nyura palunya tjananya arkalwiyangku wantima.” *

¹⁶ Ka nganalu tjana wanyu panyatja Godala kulintja wiyangku wantira tungunpungangi? Wiya panya paluru tjana, panya Moselu tjananya Itjipalanguru katingu. ¹⁷ Palu nganaku tjanampa Godanya rawa mirpanaringi kuli 40? Wiya panya palumpa tjanampa, panya pilangkaya tungunpungkula kura palyanangi, munu panyaya nyara palula arangka pilangka ilungi. ¹⁸ Godalu panya mirpanarira kalkunu alatji, “Paluru tjana ngura panya ngayulu kalkuntjitjangka wirkankunytja wiyatu ngayula nyinara pakuwiyaringkunyjtikitja.” Palu ngananya tjananya wanyu paluru alatji wangkangu? Wiya panya palula tjanalatu, panya palula tungunpungkupai tjutangka. ¹⁹ Kala kulini panya tjana Godaku mulamularingkuwiyangku wantira ngura panya pakuwiyaringkupaingka putu wirkanangi.

4

¹ Palu ngura panya paluru ala alatjitu ngaranya nganana Godala wirkara nyinara pakuwiyaringkunyjtaku. Kala uti purkarangku kulinma, ngunti kulira ngura panya palula ngatalarinytjaku-tawara. ² Panya nganana kulinu Tjukurpa Palya, panya

* **3:15** Psalm 95:7-8

Godalulanya altinyi palula tjunguringkula pakuwiyaringkunyjtaku. Ka palu purunytjuya anangu Israelkunu tjtutangku iriti kulinu Godalu palula tjanala tjukurpa palu purunypatu wangkanyangka. Palu paluru tjana panyaya kulira wantingu munuya wantinytjatjanu putu wirkanu ngura panya Kainanta, panya tjana Godaku mulamularingkunyjtaja wiyangku wantingi paluru kalkunnyangka. ³ Palu nganaṅa palumpa tjukurpa wiruku tjukaruru mulamularingkula palula tjungu ngaranyi pakuwiyaringkunyjtikitja. Panya Godalu kuwaripatjaranguru alatjitu uwankara palura wiyaringkunyjtatjanungku rawangkuṅu altingi anangu tjuta palula tjunguringkula pakuwiyaringkunyjtaku. Kaya uti iriti miri panya tjuta mulamularingama, palu tjana kulira wantingi. Ka palulanguru Godalu tjananya painu panya nyiringka alatji ngaranyi Godalu wangkara kalkuntja,

“Ngayuluna tjanampa mirpanarira mulamulangku tjananya kalkunu nyanga alatji,
 ‘Paluru tjana ngura panya ngayulu kalkuntjitjangka wirkankunyjtaja wiya alatjitu ngaraku ngayula tjungu nyinara pakuwiyaringkunyjtikitja.’” *

⁴ Panya iriti walkatjunkunyjtaja nyiringka ngaranyi nyanga alatji,

“Tjintu 6 uwankara palura wiyara Godanya pakuwiyaringu tjintu panya 7-ta.” *

* 4:3 Psalm 95:11 * 4:4 Genesis 2:2

5 Munu piruku Godalu wangkanytja nyiringka ngaranyi nyanga alatji,
 “Paluru tjana ngura panya ngayulu kalkuntjijtjangka wirkankunytja wiya alatjitu ngaraku ngayula tjungu nyinara pakuwiyaringkunytjikitja.” *

6 Panya nganmanyitja tjutangku Tjukurpa Palya kulira wantingi munuya palulanguru ngura panya palula wirkankunytja wiya. Palu ngura paluru kuwari ala alatjitu ngaranyi kutjupa tjuta wirkara pakuwiyaringkunytjaku. ⁷ Nyanga palunyala kulini panya ngula kuli tjuta mulapa ngarala wiyaringkunyangka Godalu panya palunyatu piruku kalkunu Davidala, ka paluru anangu tjutangku kulintjaku walkatjunu nyiringka alatji,
 “Nyura kuwari Godalu wangkanyangka kulira tungunpungkunytja wiyangku wanganrangku kulinma.” *

8 Uwa, ngura panya pakuwiyaringkupainya kuwaritu ala ngaranyi, panya Tjatjuwalu tjananya Kainanta wirkakatinyangka Godalu malangka rawangkutu wangkangi, “Tjintu kutjupa ngaranyitu anangu tjuta wirkara pakuwiyaringkunytjaku panya ngayulu kalkuntjijtjangka.” Kala nyanga palulanguru kulini alatji, “Munta-uwa, Tjatjuwalu tjananya Kainanta wirkakatinyangkaya mulamula pakuwiyaringkunytja wiyatu nyinangi.”*

* 4:5 Psalm 95:11 * 4:7 Psalm 95:7-8 * 4:8 Tjatjuwalu panya Moseku arangka mayatjarira Israelkunu tjuta katirinangi Mosenya iluyangka malangka.

9-10 Munula kulini mulapa ala ngaranyi kuwaripatu nganana Godaku walytja tjuta palula tjunguringkula pakuwiyaringkunyjtjaku, panya Godanya purunypa, panya paluru tjintu 7-itja pakuwiyaringu, palu purunypa. Panya Godanya tjintu 6 pulkara warkaringi munu warka wiyaringkula pukulpa alatjitu nyinara pakuwiyaringu. Ka nyara palu purunypa nganana Godalu kalkuntjitjangka wirkara nyinara pakuwiyaringkuku, warka nganampa palyantjatjanu. ¹¹ Kala palulanguru uti kurunpa winkingku Godaku iwara tungun-tunguntu arkara wananma Godalu kalkuntjitjangka wirkara pakuwiyaringkunyjtjikitjangku. Panya tjanaya iriti mulamularingkuwiyangu wantingi munuya Godala tungunpungkula paturingu. Kala uti pala palula-tawara tjukaruru mulamularingama munu Godala titutjarangu wanganarangku kulinma.

¹² Panya Godaku tjukurpa wankakutu alatjitu anangungku wangkanytja purunypa wiya, panya Godalu wangkanytja uwankara mulapa alatjitu utiringkupai. Palumpa wangka tjula iri kampa kutjaratjara, pulka mulapa. Panya tjula iri pulkangu anangu wakara tarka unngutja miiltjingalpai munu katara ala lipilpai, palu purunytju Godaku tjukurtu nganananya unngu kulintja uwankara tjukarurungku miiltjingalpai. ¹³ Panya Godanya uwankaraku ninti, ka nganana putu palula kumpini. Paluru uwankara nitingku nyakula kulini nganana unngu kulintja kulu, kala putu kutitjura kanyini. Munu ngula paluru kutjungku nganananya unngu nyakula

puntura wangkaku, ka nganana putu palula wiyamankuku.

Pala palulangurula uti Godaku iwara tungun-tunguntu wanama paluru kalkuntjitjangka wirkara pakuwiyaringkunyjtikitjangku.

Jesunya Tjukurtjara Pulka

¹⁴ Uwa, nganana panya Jesuku mulamularinganyi. Panya paluru nganampa tjukurtjara pulka Godaku katja munu paluru ankula Godala tjungurinkula nganampa ngalkilpa nyinanyi. Kala pala palulanguru nganana uti palumpa mulamularinkula wantinytja wiyangku palunya tungun-tunguntu wanama.

¹⁵ Panya anangu tjutangu mamu tjutangu kulu ngananananya rawangku arkalpai kuraringkunyjtaku. Palu nganampa ngalkilpa pulkangku nyanganpa nintingku kulini panya nganmanytjulpiya mantangka nyinanyangka palu purunytjutu palunya mukumukura arkaningi kuraringkunyjtaku. Palu paluru kulira wantingi kura palyantja wiyangku. Munu paluru nganampa ngalturinganyi panya nganana putu kulira wantipai kutjupangku mukumukunnyangka.

¹⁶ Kala uti palulanguru raparingkula Godala ilaringama nguluringkunyjtja wiya. Panya paluru ngaltunytju mukulya mulapa nganampa nyinanyi munu nganana kura palyantjatjanu piwiyaringkunyangka nganampa kalyparingkupai. Kala uti kurantjikitjangku arkannyangka palula tjapinma ngananananya anga-kanyintjaku

kuraringkunytjaku-tawara, kalanya mulapa paluru ngaltunytjungku anga-kanyilku.

5

¹ Godalu panya wati tjukurtjara pulka anangu tjutanguru ngurkantara tjunkupai palumpa tjanampa ngalkilpa nyinara warkarinytjaku.* Ka tjukurtjara pulka nyara paluru inmangka kuka pungkula tiliwakara Godanya ungkupai mai kulu, paluru nyakula anangu tjuta kalypangku pungguwiyangku wantinytjaku tjana kura palyantjitjanguru.

² Ka anangu tjutangku tjinguru watarkungku kura palyannyangka tjukurtjara paluru ngaltunytjungku tjananya purkarankupai, panya paluru kulu upa kunpu wiya tjana purunypa.

³ Pala palulanguru tjukurtjara paluru kuka pungkula tiliwakara Godanya ungkupai palumpa kuranguru kulu anangu tjutaku kuranguru kutju wiya, ka Godalu palunya kulu kalypangku wantipai paluru kura palyantjitjanguru anangu kutjupa tjuta purunypa.

⁴ Palu anangu nyara palurunku walytjangku pulkanmankupai wiya tjukurtjara pulka nyinanytjikitjangku, palu paluru Godalu ngurkantankunyangka kutju tjukurtjararingkupai, Aaronnga purunypa, panya palunya Godalu ngurkantara tjunu tjukurtjara pulka nyinanytjaku.

⁵ Ka nyara palu

* **5:1** Panya Aarontanguruya wati tjukurtjara pulka tjuta nyinakatingi wanapari wanapari Godalu wati tjutanguru ngurkantara tjunkunytja.

purunytjutu Christalu palurunku walytjangku pulkanmankunytja wiya tjukurtjara pulka nyinanytjikitjangku. Palu Godalu palunya ngurkantara tjunu alatji wangkara,
 “Nyuntun ngayuku katja, kana nyanganguru nyuntunya titutjarangku katjanmankuku.” *

Wangka nyangatja nyiringka walkatjunkunytja ngaranyi. ⁶ Ka nyiri palulatu tjukurpa kutjupa ngaranyi Godalu wangkanytja nyanga alatji,
 “Nyuntun tjukurtjara pulka titutjara nyinaku milmilpa mulapa, wati Milkitja-tikanya purunypa,
 panya paluru tjukurtjara pulka mulapa iriti nyinangi, palu purunypa.”* *

⁷ Ka Godalu panya Jesunya ilunytjaku-tawara wankarunkunytjaku ngarangi alatjitu. Ka panya Jesulu mantangka nyinaralpi Godala pulkara mirara tjapira ulangi palunya rapantjaku ngulu wiya ilunytjikitjangku. Palu paluru Godala titutjarangku wanganarangku kuliningi palurunku pulkanmankunytja wiyangku, ka nyara palulanguru Godalu palunya ngapartji kulinu paluru ulara tjapinnyangka, munu palunya rapanu ngulu wiya ilunytjaku.

⁸ Ka nyura tjinguru kulini palunya pikantankunytja wiya nyinanytjaku-palku. Palu palunyaya pungu alatjitu, ka pikatjararingkula ilungu. Panya paluru Godala wanganarangku kuliningi ka pika palumpa wirkanu. Munu

* 5:5 Psalm 2:7 * 5:6 Tjukurpa Milkitja-tikanya-tjara ngaranyi nyiri ini Genesis-ala 14:17-20. * 5:6 Psalm 110:4

paluru nintiringkula kulinu panya anangungku Godala wanganarangku kulinnyangka pika palumpa utiringkupai. ⁹ Panya Godalu Jesunya wituṅu ankula mantangka kutjupa kutjupa tjuṭa palyantjaku. Ka paluru wanganarangku kulira palyanu munu panya ilungu, ka nyara palulanguru anangu tjuṭa kuwari wankaringkunyjtaku tjanampa ngaranyi alatji, tjana palula wanganarangku kulirampa. Nyara palulanguruya anangu tjuṭa Godala tjungu titutjara nyinaku. ¹⁰ Palu Godalu Jesunya tjunu tjukurtjara pulka mulapa titutjara nyinanyjtaku, panya wati Milkitja-tikanya tjukurtjara pulka nyinangi, palu purunypa.

¹¹ Tjinguruna piruku nyurala tjakultjunama tjukurpa nyangatja panya Jesunya Christanya Milkitja-tikanya purunypa nyinanytja. Palu putuna nyurala utingku wangkanyi panya nyura tjukurpa pulka putu nguwanpa kulilpai.

¹² Nyura nganmanypa Godaku walytjaringu munu kuwari nyura tjinguru palumpa tjukurku ninti pulka nyinama munu nyura tjinguru anangu kutjupa tjuṭa ngapartji nintinma kuwari kutju Jesuku walytjaringkunyjtja tjuṭa. Palu wiya, nyura nintiringkunyjtja wiyatu nyinangi munu nyura tjukurpa nganmanyitjaku watarkuringu, ka nyuranya nganana piruku nintintjaku ngaranyi, nyura iti purunytju kuwaripanguṭu ipi tjikinnyangka. Panya iti tjuṭangu mai kuka putu ngalkupai munuya paluru tjana ipi kutju tjakilpai, palu purunypa nyura tjukurpa pulka tjuṭa putu kulilpai, munu nyura tjukurpa panya nganmanyitja

utitja tjuṭa kutju titutjarangku kulilpai.
 13 Panya iti tjuṭangku puṭu ngurkantankupai
 tjukarurungku palyantjikitjangku. Ka nyura
 nyara palu purunytjuṭu puṭu ngurkantankupai
 tjukarurungku palyantjikitjangku. 14 Palu
 uti nyura anangu pulka tjuṭampa tjukurpa
 pulka tjuṭaku nintiringama. Munu nyura
 nyara palulanguru nintingku kulilku palya
 tjukaruru nyinanytjikitjangku munu kura kulū
 wantinytjikitjangku.

6

1-2 Palu nyaaku nyura tjukurpa nganmanyitja
 tjuṭa Christanyatjara rawangku wangkara
 kulintjikitja mukuringanyi? Wanyuya tjukurpa
 nganmanyitja tjuṭaku nintiringkunyjtatja-
 nungku waintara kulinma tjukurpa kutjupa
 tjuṭaku nintiringkunyjtikitjangku. Panya
 anangu tjuṭa Jesuku walytjaringkunyaangka
 nganana palula tjanala nganmanytju
 nintilpai iwara kurangka ankunyjtatjanu
 kampa kutjuparinytjaku ilunytjaku-tawara,
 munu Godaku mulamularingkula palumpa
 iwarangka ankunyjtaku. Munula tjanala
 nintilpai minangka baptise-katinytja, munu
 katangka mara tjunkunyjtja kulū panya
 Godalu witulyankunyjtaku. Munula tjanala
 nintilpai panya ngula Godalu nganannya
 ilunyaangka wankara pakaltjingantja, munu
 paluru anangu uwankara ngurkantara
 tjarantja, munu kura tjuṭa paira iyantja
 ngura kurakutu titutjara nyinanytjaku. Alatji-
 alatjila tjanala nintilpai kuwari kutju Jesuku

walytjaringkunytja tjuta. Ka nyura nyaaku tjukurpa nyanga palumpa tjanampatu piruku nintiringkunytjikitja mukuringanyi? Uti nyura Godanya wanarampa tjukurpa kutjupa tjutaku kulu rawatu nintiringkukatima munkaritja tjutaku kulu. ³ Uwa, wanyula tjukurpa kutjupa tjutaku kulu rawa nintiringama Godalu nintintjikitja mukuringkunyangka.

⁴⁻⁶ Kulilaya! Tjinguru anangu kutjupa Jesuku walytjaringanyi. Ka panya Godalu palula utini palumpa tjukurpa, ka kulilpairinganyi munu palula tjunguringkula kurunpa pukularinyi panya palunya wankarunu Godalu. Ka panya Kurunpa Milmilnga palula pitjala unngu tjarpara nyinakatinyi. Ka paluru unngu kulini panya Godalu kalkuntjitja mulapa tjukaruru ngaranyi. Munu kulini, “Mulapa Kurunpa Milmilnga witulya pulkanya ngayula unngu warkarinyi.” Palu tjinguru paluru nyanganpa uwankara kulintjatjanungku Jesunya wantiku munu ala kutjupangka ankuku, kala yaaltjingara palunya Godalakutu malakungku katiku kampa kutjuparira palunya wanantjaku? Wiya alatjitu, panya paluru nganmanypa Jesuku mulamularingu munu palulanguru ngulalta palunya ngunti kurara wantingu. Ka nyangatja panya Jesunya piruku punu katakutjarangka utitjungkunytja purunypa. Panya anangu tjutangu Godaku katja wantira mirara wangkangi punu katakutjarangka utitjungkunytjaku, palu purunypa paluru palyani Jesunya wantikatira, kaya anangu tjutangu palunya nyakula Jesunya anani.

7-8 Tjukurpa nyangatjaya kulila! Wati kaanangka warkaripaingku uninypa tjunkupai mantangka mai pakaltjingantjikitjangku. Ka minangku puyira manta tulykulpai ka mai pulka pakalpai. Ka Godalu manta nyara palunya nyakula palyanmankupai. Ka manta nyanga paluru anangu kulilpai tjuta purunypa. Palu manta kutjupa kulu ngaranyi, ka nyara palunya kulu minangku puyilpai palu kutjupa kutjupa tjuta pakalpai manta nyara palula tjilka, ukiri kurakura tjuta kulukulu. Ka manta nyanga palunya tjinguru Godalu nyakula kuranmankuku. Ka ngula warungku kampara wiyalku manta nyanga palunya. Palu manta nyanga paluru anangu kulira wantipai tjuta purunypa, panya nganmanypaya Jesuku mulamularingu munuya malangka palunya wantikatira kurangka anu.

⁹ Palu nyanganpana nyurala nganmanytju tjakultjunanyi nyura Godanya wantinytjaku-tawara. Ka walytja wiru tjuta, ngayulu nyuranya kulini panya nyura iwara palyangka kutju ananyi wantinytja wiya. ¹⁰ Ka panya Godanya palya mulapa tjukaruru ngaranyi, munu nyuranya nyanganyi palumpa wirura warkarinyangka munu paluru nyurampa pukularinyi. Paluru nyanganyi nyuranya palumpa mukuringkunyangka, panya nyura palumpa walytja tjutaku mukuringkupai munu tjananya alpamilalpai. Munu nyura kuwari nyanga alatjitu nyinanyi. ¹¹⁻¹² Palu ngayulu mukuringanyi nyura uwankarangku rapangku warka wiru palyalkatinytjaku

kurunpa winkingku ilunytjakutu-wangkara. Panya Godalu nyuranya wirura kalkunu, ka nyura pukulpa patani palumpa pakuringkunytja wiya. Nyara palulanguru nyura uti rapangku titutjarangku Jesunya wananma munu nyura wiru mulapa mantjilku Godalanguru. Uwa, nganmanyitja tjuta purunytjuya wananma pakuringkuwiyangku, panya tjana iriti Godaku titutjara mulamularingangi pakuringkunytja wiya munuya nyara palulangurulta kuwari mantjini kalkuntja panya palunya.

¹³⁻¹⁴ Panya iriti mulapa Godalu Aipuramanya kalkunu alatji wangkara, “Ngayulu nyuntunya kalkuni pukulmankunytjikitjangku. Ka nyuntulanguru malatja malatja matjutaringkuku.” Munu paluru Aipuramanya palumpa mulamularingkunytjaku ini palurunku wangkara kalkunu. Tjinguru ini kutjupa pulka mulapa ngaranyangkampa paluru ini palunya wangkara kalkunma. Palu wiya, ini kutjupa pulka mulapa palula waintara ngaranytja wiya alatjitu. Ka nyara palulanguru Godalu palurunku ini wangkara kalkunu. ¹⁵ Ka Aipuramanya rawa alatjitu Godaku mulamularingangi ngururpa watarkurinytja wiya alatjitu. Ka Godalu palunya mulapatu ungu panya paluru kalkuntjatjanungku. ¹⁶ Kaya panyatja kulinma, panya kutjupangku kalkunyangka anangu kutjupa tjinguru putu mulamularingkupai, ka anangu nyara paluru mulamularingkunytjaku wati pulkaku ini wangkapai, ka anangu pulka ini wangkanyangka kulira mulamularingkupai.

17 Ka palu purunypatu Godalu tjananya ini pulka mulapa wangkara kalkunu ini palurunku tjana palumpa mulamularingkunytjaku. Panya paluru mukuringangi tjana nintingku kulintjaku paluru panya kalkuntja kutjuparinytja wiya ngaranytjaku. Munu palurunku ini wangkangu kalkuntjatjanungku tjana mulapa kulintjaku.

18 Uwa, panya Godalu mulapa tjukarurungku kalkulpai ngunti wangkanytja wiyangku, munu paluru kalkura palurunku ini wangkanytjatjanungku kampa kutjuparinytja wiyangku ungkupai. Kala nyanga palulanguru nganana pulkara raparingkula pukultu ala-alangku patani paluru nganannya kalkuntjatjanungku ungunytjaku, panya nganana Godala tjunguringu palula wankaru nyinanytjikitja. ¹⁹⁻²⁰ Palu nganana panya Godalu kalkuntja titutjarangku kulira mulamularingkula kutju kunpu tungun-tungunpa nyinaku Jesuku patara. Panya paluru Mamaku ngurakutu nganmanypa anu ilkarikutu nganampa ngalkilpa ilunytjatjanu. Panya wati tjukurtjara pulka tiinta milmilta tjarpara waintara ma-tjarpapai ngura milmilpa mulata, nyara palu purunypa Jesunya waintara tjarpangu ngura panya ilkaritjangka munu nganampa alanu ngalkilarinytjatjanungku, nganana ngapartji malawanu tjarpara nyinanytjaku palula tjungu. Panya paluru tjukurtjara pulkaringkula titutjara nyinanyi wati panya Milkitja-tikanya purunypa.

7

Tjukurtjara Milkitja-tikanya

1-3 Panya Milkitja-tikanya ngura ini Salemaku mayatja nyinangi munu paluru wati tjukurtjara pulka nyinangi God Katutjaku. Ka ini panya Milkitja-tikanya tjaa Iipuru ngaranyi munu ini paluru wangkanyi alatji, *Iwara tjukaruruku mayatja*. Ka ngura ini Salemanya wangkanyi alatji, *Kalypa nyinanytjanya*. Kala palulanguru Milkitja-tikanya kulilpai nyanga alatji, “Palurumantu mayatja pulkanku anangu tjuta kalypa nyinanytjaku palyalpai.” Palu ngananya wanyu palumpa mama ngunytju, tjamu kami kulu? Ngurpala nyara palumpa. Palu wanyu ngura yaaltjingka iti paluru wirkanu? Munu ngura yaaltjingka paluru ilungu? Nganana ngurpa. Panya tjanaya nganmanytju nyiringka walkatjunkunytja wiyatu. Palu nganana kulini panya paluru wati tjukurtjara pulka titutjara nyinapai, Godaku katja purunypa.

Panya nganana ninti Milkitja-tikaku pulampa Aipuramaku, panya iriti Aipuramalu tjana palumpa malpa tjutangku kulu pikanku pungkula wiyanu mayatja kutjara kutjara tjanampa tjaltji tjuta kulukulu. Munuya tjanampa kutjupa kutjupa tjuta mantjira katingu ngurakutu. Ka panya ngururpa wati Milkitja-tikanya ngalya-ngaparikatingu Aipuramanya wati-pitjanyangka nyakula munu palunya pukulmanu alatji wangkara, “Godalu nyuntunya wirura kanyinma marangku.”*

* 7:1-3 Genesis 14:17-20

Ka palulanguru Aipuramalu kutjupa kutjupa tjuṭa tjana mantjira katinytja tjarara tjukutjuku ungu Milkitja-tikanya mayatja pulka kulira.*
 4 Panya Milkitja-tikanya-mantu mayatja pulka mulapa kutjupa tjutangka waintarinytja, ka Aipuramalu Israelkunu tjuṭaku tjamu nganmanyitjangku palunya ungu tjarara warmalanguru tjulyara katinytjatjanungku. Tjinguru Aipuramanya palu purunypa pulka mulapa nyinanyangkampa Milkitja-tikalu tjarara ungama palunya. Palu wiya, Aipuramalu palunya tjarara ungu mayatja pulka kulira.

5 Ka panya nganaṅa Israelkunu tjuṭangku wati tjukurtjara tjuṭa ngurkantankupai anangu Levikunu tjuṭanguru.* Munula Moseku tjukurpa kulira nganaṅa kutjupa kutjupa tjuṭa kanyintjatjanungku tjarara tjukutjuku ungupai palunya tjananya tjukurtjara tjuṭa.* Uwa, tjana walytjanguṅu mantjilpai, panya paluru nganaṅa uwankara Aipuramalanguṅu. 6-7 Palu wati tjukurtjara nyanga Milkitja-tikanya Aipuramaku walytja wiya, wati malikitja, Levilanguṅu wiya. Munu paluru mantjinu Aipuramalu tjarara ungunyangka, munu palunya wangkara

* 7:1-3 Alatji Aipuramalu tjarara ungu kutjupa kutjupa uwankara paluru tjana katinytja utulura lipula tjunu utulu kutjupa utulu kutjupa 10-pa, munu palulanguru palunya utulu kutjutja ungu 10-nguru Milkitja-tikanya, munu utulu 9 palurunku kanyinu. * 7:5 Levinya panya Aipuramaku pakaliku katja, panya Jacobaku, iriti mulapa nyinanytja.

* 7:5 Tjukurpa panya Godalu Mosenya ungunytjitjangku alatji wangkanyi, “Kutjupa kutjupa uwankara nyura kanyintjatjanungku tjarara tjukutjuku ungama wati tjukurtjara tjuṭa.”

pukulmanu. Palu panya Godalu Aipuramanya nganmanytju kalkunu pulka nyinanytjaku, kala tjinguru kulini paluru mayatja pulka mulapa Milkitja-tikala waintarinytja. Palu wiya, nyangatja Milkitja-tikalu palunya wangkara pukulmanu nganmanypa pulka mulapa nyinanytjatjanungku. Panya nganana ninti wati malatjangku wati pulkanya alatji wangkara pukulmankupai wiya, palu wati pulkangku kutju pukulmankupai wati malatja.
 8 Kulini nyura? Panya Milkitja-tikanya Aipuramala waintara pulka mulapa nyinangi, wati tjukurtjara tjuangka kulu. Panya paluru tjana mantjilpai Israelkunu tjuangka tjarara ungunyangka palu tjukurtjara paluru tjana ilura wiyaringkupai. Ka Milkitja-tikalu Aipuramala mantjinu kutju-ara paluru tjarara ungunyangka, munu palulanguru paluru yaaltjiringu? Wiya nyiringku tjakultjunanyi paluru wanka nyinanytja, ilunytja wiyatu.*

9-10 Uwa, nganana rawangku tjarara ungukupai wati tjukurtjara tjuta. Palumpa tjanampa tjamu nganmanyitja ini panya Levinya, panya Aipuramaku pakaliku katja. Ka panyaya tjukurtjara tjuta nyinakatingi malatja malatja Aipuramalanguru. Ka panya Aipuramalu Milkitja-tikanya tjarara ungu Levila kuwaripangka paluru tjana nyinanytja wiyangka. Paluru kutjungku ungu Milkitja-tikanya, palu tjanampa kulu ungu nganmanytju watarku-watarkungku, panya Leviku tjanampa

* 7:8 Genesis 14:17-20

palumpa walytjapiti malatja malatjaku kulu.

Jesunya Tjukurtjara Nyinanyi Milkitja-tikanya Purunypa

11 Ka Moselu nintiningi tjukurpa panya Godalu palunya ungunytja, munu paluru wangkangi warka wati tjukurtjara tjutaku kulu. Ka palumpa kuta Aaronnga tjukurtjara nganmanyitja nyinangi. Wati panya paluru Levilanguru. Ka ngulalta palula malangka palumpa walytjapiti malatja malatja tjukurtjara tjutaringangi. Nyanga paluru tjana panya uwankara Leviku tjamupiti malatja malatja wanapari wanapari. Palu Israelkunu tjutangku tjukurpa panya Godalu Mosenya ungunytjanguru nintiringu yaaltji-yaaltji tjukaruru nyinanytjikitja, munuya nintiringu kura palyantjatjanungku kuka katira ungunytjikitja wati tjukurtjaranguku pungkula Godanya ungunytjaku paluru tjananya kura palyantjitjanguru kalypanguku pungkuwiyanguku wantinytjaku. Palu nyanga alatji palyaraya Godala mirangka tjukaruru ngaranytja wiya. Panya ara nyanga nganmanyitja wanaraya putu nguwanpa palyaringangi tjukaruru ngaranytjikitja Godala mirangka.

Ka nyara palulanguru Godalu tjukurtjara kutjupa iyanu ini Jesunya, panya tjukurtjara nganmanyitja tjutangku anangu tjuta putu palyaningi Godala mirangka tjukaruru ngaranytjaku. Palu Jesunya tjukurtjara kutjupa mulapa, Aaronnga tjana purunypa wiya, palu

Milkitja-tikanya purunypa. ¹² Panya Godalu Jesunya tjukurtjara iyara ara panya nganmanyitja kampa kutjupanu. Munu paluru wati tjukurtjara tjutaku warka wiyanu munu kampa kutjupanu. Ka nganana kuwari ara kutjupangka nyinanyi ara kuwaritjangka. ¹³⁻¹⁴ Panya ara nganmanyitjangkaya Levilanguru kutju tjukurtjara nyinapai, palu Jesunya tjukurtjara kutjupa Leviku walytjapitinguru wiya, palu Judahku walytjapitinguru. Panya Judah-nya tjana walytjarara walytjarara tjukurtjara nyinanytja wiyatu, panya Moselu tjananya wangkanytja wiya kuka pungkula Godanya ungunytjaku paluru anangu tjutaku kalyparingkunytjaku. Wiya, paluru Levikunu tjuta kutju wangkangu. Kala nyanga palulanguru kulini ara panya nganmanyitja wiyaringu, kala ara kuwaritjangkata nyinanyi.

¹⁵ Uwa, mulapa Godalu ara nganmanyitja kampa kutjupanu, panya paluru tjukurtjara kutjupa mulapa ngurkantanu Milkitja-tikanya purunypa, Aaronga tjana purunypa wiya. ¹⁶ Panya ara nganmanyitjangkaya tjukurtjara tjuta ngurkantara tjunkupai Leviku walytjapitinguru. Palu tjukurtjara nyangatja Levikunu wiya. Paluru panya wanka titutjara nyinanyi wiyaringkunytja wiya alatjitu, ka nyara palulanguru Godalu palunya ngurkantara tjunu tjukurtjara nganampa nyinanytjaku. ¹⁷ Panya iriti nyiringka walkatjunkunytja nyanga alatji ngaranyi,
 “Nyuntun tjukurtjara pulka titutjara nyinaku
 Milkitja-tikanya purunypa ilunytja wiya.”

*

Alatji Godalu Jesunya wangkangu.

¹⁸⁻¹⁹ Uwa, ara nganmanyitja wiyaringu, panya ara nyara paluru kunpu wiya kurakura ngarangi, panya ara nyara palulawanu nyinara anangu tjuta putu tjukaruru nyinangi. Ka nyara palulanguru Godalu ara panya palunya kampa kutjupanu munu ara kuwaritja wiru mulapa palyanu nganana mulamularingkula palula tjunguringkunyjtaku.

²⁰⁻²¹ Pirukula wanyu nyangatja kulinma! Panya Jesunya tjukurtjararingkunyangka Godalu palunya wangkangu alatji,

“Ngayuluna nyuntunya mulamulangku kalkuni mununa ngayulu piruku walytjangku kulira kampa kutjuparinytja wiya.

Panya nyuntun tjukurtjara pulka titutjara nyinaku wiyaringkunyjtja wiya.” *

Palu panya tjukurtjara nganmanyitja tjuta kalkuntja wiyatu tjana titutjara tjukurtjara nyinanyjtaku. Wiya, paluru Jesunya kutju kalkunu.

²² Ka nyara palulanguru Jesulu ara kuwaritja titutjara ngaranyjtaku kanyini. Ara nyara paluru panya Mosenya ungkunyjtja purunypa wiya, ara kutjupa wiru mulapa.

²³⁻²⁴ Kaya nyangatja kulu kulila kutjupa ngapartji. Panya tjukurtjara tjuta mulapaya nyinakatingi, munuya tjukutjuku warakarira tjilpiringkula ilungi, kaya kutjupa tjuta ngapartji warakarangi. Palu Jesunya kulinma paluru titutjara nyinaku ilunyjtja wiya

* **7:17** Psalm 110:4 * **7:20-21** Psalm 110:4

alatjitu. Nyara palulanguru panya paluru kutju tjukurtjara pulka titutjara nyinaku wiyaringkuntja wiya. ²⁵ Ka pala palulanguru anangu uwankara palumpa mulamularingkula Godalakutu pitjanyangka paluru tjananya mulapa wankarunkuku Godala tjungu pukulpa nyinanytjaku. Panya paluru wanka titutjara nyinanyi munu tjanampa rawangku Mamala tjapini wiyaringkuntja wiyangku.

²⁶ Panya ara nyanga kuwaritjangka Jesunya kutju nganampa tjukurtjara pulka nyinanyi munu nganampa kutjupa kutjupa uwankara tjukarurungku palyalpai. Paluru nganmanyitja tjuta purunypa wiya. Paluru panya tjukaruru mulapa nyinanyi munu kuralpai wiya alatjitu. Paluru kuraku ngurpa anangu tjuta purunypa wiya. Paluru kutjupa alatjitu, palya mulapa. Munu paluru mayatja pulka mulapa uwankarangka waintara nyinanyi Godala tjungu ngura nyara ilkarangka. ²⁷ Paluru wati tjukurtjara pulka purunypa wiya, panya tjukurtjara paluru putu palya mulapa nyinapai munu kura palyalpai. Palulanguru paluru kuka pungkula tiliwakalpai Godalu nyakula palunya munu anangu tjuta kulu kura tjuta palyantjitjangu kalypanghku wantinytjaku. Munu tjukurtjara panya paluru alatji titutjarangku palyalpai tjintu kutjupa tjintu kutjupa. Palu panya Jesunya palu purunypa wiya, panya paluru kutju-arangku palyanu munu ngalkilpa ilungu anangu uwankaraku kuranguru, ka nyara palulanguru Godanya anangu tjutaku kalyparingkupai.

28 Nyura uti kulini? Panya Moseku tjukurtu wangkangi wati tjukurtjara pulka anangu tjutanguru ngurkantara tjunkunytjaku. Palu wati paluru tjana titutjara upa nyinangi, panya paluru tjana nganana purunypa anangu alatjitu. Uwa, Godalu ara panya nganmanyitja tjananya ungu, palu malangkalta paluru mulamulangku kalkunu ara kuwaritjaku, munu ngurkantara tjunu palumpa katja tjukurtjara pulka nyinanytjaku ara nyanga kuwaritjangka. Ka paluru panya Godanya mukuringkunytja uwankara tjukarurungku palyara wiyara wiru mulapa titutjara nyinanyi.

8

Jesunya Tjukurtjara Pulka Ara Kuwaritjaku

1-2 Palu tjukurpa nyangatjana nyurala nyaaku wangkanyi? Wiya panya nyura kulira tjukurpa pulka kulintjaku nyangatja Jesunya panya nganampa tjukurtjara pulka nyinanyi Mayatja Godala tjungu ngura ilkaritjangka. Munu paluru warkarinyi ngura milmilpa mulata panya Godalu palyantjitjangka ngura panya ilkaritjangka. Paluru tiinta milmilpa panya Moselu tjana nganmanytju palyantjitjangka warkarinytja wiyatu. ³ Panya nyura ninti Godalu tjunu wati tjukurtjara tjuta anangu tjutanguru mai kuka kulu mantjira palunya ma-ungkunytjaku. Ka uti nganampa tjukurtjarangku Jesulu kulu palu purunytjutu Godanya ungama panya paluru nganampa tjukurtjara pulka nyinanyi ilkaringka. ⁴ Palu tjinguru Jesunya

mantangka rawatu nyinarampa tjukurtjara wiyatu nyinama, panya tjukurtjara tjutaya nganmanypa nyinangi wati Levilanguru munu panya paluru tjana Moseku tjukurwanu nyinara Godaku warkaringi tiinta panya milmilta.

⁵ Palu tiinta nyara palunyaya unytjungku mantangka kanyiningi. Panya tiinta nyara paluru nganannya nintini ngura kutjupa ilkaringka ngaranytja milmilpa mulapa. Panya iriti Mosenya tiinta panya palunya palyantjikitja palyany-palyanyarinyangka Godalu palula wangkangu alatji, “Ngayulu panyaananta apu katu wangkara nintinu tiinta milmilpa palyantjaku. Ka panya palu purunypa alatjitu palyala tjukarurungku.” Ka panya Moselu tjana palyanu tiinta mantangka, ka tiinta nyanga mantatjangku ngura ilkaringka ngaranytja nintini.

⁶ Palu Godalu Jesunya warka wiru mulapa ungu, ka paluru ara kuwaritja pakaltjinganu palya mulapa, panya wati tjukurtjara kutjupa tjutangku palyantja purunypa wiya. Panya palurunku walytjangku ungunytja pulka mulapa tjukurtjara kutjupa tjutangku kuka ungunytja purunypa wiya. Panya Godalu Jesulanawangku kalkuntja pulka mulapa ngaranyi, Moselawangku kalkuntja purunypa wiya. Ka nyara palulanguru Jesunya tjukurtjara pulka mulapa nyinanyi tjukurtjara kutjupa tjutangka waintarira. ⁷ Panya anangu tjutangku ara irititja wanara putu wankaringangi. Ka nyara palulanguru Godalu ara kutjupa kuwaritjalta pakaltjinganu.

8 Palu Godalu nyangu palumpa anangu tjuta kuraringkunyangka, panya anangu nyara paluru tjanaya palumpa ara Mosenya panya ungkunytjitja wanalwiyangku wantinyangka. Munu paluru tjanala wangkangku nyanga alatji, “Kulilaya Jew tjutangku ngura Israelta munu Judah-la nyinanytja tjutangku!

Ngayulu ngula palyalku nyurampa ara kutjupa kuwaritja.

9-10 Palu ara kuwaritja panya nganmanyitja purunypa wiya.

Panya iriti ngayulu ara nganmanyitja wangkangku Mosela tjanala ngura panya Itjipalanguru katinytjatanngku.

Ka panya paluru tjana kulira wantira tungunpungu, kana palulanguru tjananya wantingu.

Palu nyangatja panya ara kuwaritja ngayulu kalkuni Israelkunu tjuta tjana ttuttujarangku kulilkatinytjaku.

Ngayulu ngayuku tjukurpa tjanala unngu nintilku tjana ara nyanga palunya pina alaringkula tjukarurngku kulintjaku.

Kanya ngayunya kutju mulamulangku walkulku munuya ngayuku walytjapiti mulapa nyinaku.

11 Palu uwankarangkunya ngayunya tjukarurngku ngurkantankku,

ka kutjupangku anangku kutjupa arkara wituwitutja wiya Mayatjaku nintiringkunytjaku.

Panya uwankarangkunya alatjutu ngurkantankuku, anangku kuranyitja tjutangku

munu anangu malatja tjutangku
kulukulu.

- 12 Kana ngayulu ngaltunytjungku tjana kura palyantjitjanguru tjananya kalypangku wantiku,
mununa tjana kura palyantjitjaku watarkuriku alatjitu piruku kulintja wiya.” *

Alatji Godalu iriti wangkangu anangu tjutangka ara kuwaritja palyantjikitjangku.

- 13 Ka nyura kulini? Panya ara nyanga kuwaritja wangkara utira Godalu ara nganmanyitja wiyaringkunyujaku wangkangu, ka panya kuwari nguwanpalta wiyaringanyi.

9

Tiinta Milmilpa Mantatja Munu Ilkaritja

1-3 Palu ara nganmanyitjangka Godalu tjukurpa tjuta wangkara ungu tjana kulira tjukarurungku palunya walkuntjaku inmangka. Munu tjukurpa kutjupa tjuta wangkara ungu tiinta milmilpa tjukarurungku palunyatu palyantjaku inmaku. Kaya mulaptu palyanu tiinta panya palunya munuya pala palula inma kanyiningi. Ka tiinta panya paluru kampa kutjaratjara, kampa tjangatitja ngura milmilpa, ka kampa kutjupa munkaritja ngura milmilpa mulapa, ka ngurur-kutjara mantara wiru waraly-waralyngarala angatjunangi kampa nyara munkaritja. Ka kampa tjangatitjangka punu tili tjutatjara ngarangi. Ka taipula kulu

* 8:12 Jeremiah-ku 31:31-34

ngarangi mai nyumatjara panya milmilmarā Godanya ungunytja.

4 Ka kampa munkaritjangka ngura panya milmilpa mulata piti gold-nguru palyantja ngarangi. Ka piti unngu kutjupa kutjupa ngaringi panya tjana kutjalpai wiru paṅtinytjaku. Ka pakutja pulka panya kalkuntjitja kulu kampa pala palula ngaringi puṅunguru gold-nguru palyantja. Ka pakutjangka unngu walpayata purunypa gold-nguru palyantja ngarangi mai panya manna-tjara. Ka Aaronku tjukara kulu ngaringi pakutjangka unngu. Panya iriti puṅu tjalytjaruru tjuṭa pakaṅu tjukara pala palula. Ka apu tjiwa kutjara kulu pakutja palula unngu ngaringi, tjukurpa panya pulka tjuṭatjara panya Godalu walkatjura ungunytja. 5 Ka pakutja pala palula katu angelpa purunypa kutjara nyinangi nyalpitjara gold-nguru palyantja. Nyanga paluru pula panya Godanya nyinanytja utini. Munu pula nyalpi kutjara lipiringkula ngaparku nyinara pakutja anga-tjutura nyinangi. Ka palula pulala ngururpa nyinara Godalu anangu tjuṭaku ngalturingkupai, munu tjukurtjara pulkanku pakutja palunya milkalingka kurpinnyangka paluru anangu tjuṭa kura tjuṭa palyantjitjanguru kalypanku wantipai pungkunytja wiyanku. (Uwa, tjinguruna tjukurpa kutjupa tjuṭa wangkama tiinta nyanga palunyatjara, palu kuwarina wantinyi muṭumuṭu walkatjunkunytjikitjangku.)

6 Ka panya tjana tiinta, munu pakutja panya, kutjupa kutjupa tjuṭa kulu tjukarurungku

palyara wiyanu. Kaya palulanguru tjintu kutjupa tjintu kutjupa wati tjukurtjara tjuta tjarpangi tiinta panya kampa tjangatitjangka, ngura panya milmilta, munuya warika tjanampa palyanangi. ⁷ Palu kampa panya munkaritja milmilpa mulapa, ka wati tjukurtjara pulka kutju tjarpapai nyara palula, kulingka kutju tjuta-ara wiya, kutju-ara. Munu paluru maralpa tjarpanytja wiya, kukaku milkali pitingka katira kutju tjarpapai, munu Godanya nintilpai paluru nyakula palunya munu anangu tjuta kulu kaly pangku pungkuwiyangku wantinytjaku paluru tjana kura tjuta watarkungku palyannyangka.

⁸ Ka ara nyanga palula tjanalanguru Kurunpa Milmiltu nganananya nintini nyanga alatji kulintjaku, panya ara nganmanyitja tiinta milmilpatjara ngaranyangka nganana putu tjarpanyi kampa munkaritjangka panya milmilpa mulata. Nyanga paluru nganananya nintini panya nganana putu Godala tjunguringanyi. ⁹ Ka pala palulanguru nganana kuwari kulini ara panya nganmanyitjangku nganananya putu kurunpa palyani Godala tjunguringkunyitjaku. Panya tjana kuka mai katira ungkunyangka Godalu tjananya kura palyantjitjanguru kaly pangku wantipai, palu kurunpaya Godala tjungu mulapa nyinanytja wiya ngarangi. ¹⁰ Panya ara nganmanyitjitjangku kutjupa kutjupa tjuta wangkapai, panya mai kuka kutjupa kutjupa tjuta ngalkuntjaku munu kutjupa kutjupa tjuta wantinytjaku, munu kutjupa kutjupa tjuta tjikintjaku, kutjupa kutjupa tjuta tjikilwiyangku

wantinytjaku. Munu piruku wangkapai yaaltjingara tjananku puntu tjukarurungku paltjintjaku, munu kutjupa kutjupa tjuta kulu paltjintjaku. Palu ara nyangantu uwankarangku puntutja wangkapai kurunitja wiya, panya ara nyanga paluru tjana unytju patara ngarangi Godalu ara kuwaritja utintjaku.

11-12 Palu panya Christanya tjukurtjara pulka nyinanyi ara panya kuwaritjaku. Panya paluru tjarpangu Godaku ngura milmilta nganananya ngalkira wiru tjuta nganampa palyantjikitja. Palu ngura nyara palunya watingku palyantja wiyatu, panya nyaratja ngura mantatja wiya, ilkaritja wiru mulapa. Ka panya Jesulu milkali nanikutanguru puluka kulunypanguru mantjira katinytja wiyatu ngura nyara palulakutu. Palu palurunku ilura milkali palurunku tjutingu, munu ngura panya milmilta ma-tjarpangu kutjura alatjitu, tjuta-ara wiya, munu nyara palulanguru paluru nganananya kuranguru wankarunu ngana Godala mirangka kunta wiya nyinanytjaku titutjara.

13-14 Ara panya nganmanyitjangku alatji wangkanyi panya watingku kutjupa kutjupa pampuntjatjanu putu tiinta milmilta tjarpapai, palu uti paluru wati tjukurtjarangka nganmanypa wirkanama, ka paluru nanikutaku milkalingka, munu puluka nyitayiraku milkalingka kulu mantjira palunya puntu winki kurpinma, munu tjinguru puluka kungka kulunypa kampara tjunparingkunyitjita tjunpa mantjira minangka urura palunya kurpinmatu. Ka nyara palulangurulta wati

paluru palyaringanyi Godanya walkuntjikitja tiinta nyara milmilta tjarpara.

Uwa, panya kukaku milkalingku tjunpangku kulu wati nyara palunya palyani Godanya walkuntjaku. Palu milkali nyanga kuka tjutanguru unytju kutju ngaranyi mantatja. Palu Christaku milkali palya mulapa uwankarangka waintarinytja. Panya Kurunpa Milmiltu titutjara nyinapailu Jesunya kunpunnyangka paluru wiru mulapa nyinanytjatjanungku punu katakutjarangka ilura palurunku puntu winki Godanya ungu milkali tjutira. Nyara palulanguru paluru nganannya ungu tjukaruruni, kala ara panya nganmanyitja tjuta palyantja wiyaringu, panya ara palunya tjananya wanara nganana putu palyaringangi kuka pungkula rawangku unkula unkula. Palu panya Jesulu nganannya mulapa kulintja tjukarurunu nganana kunta wiya Godala tjunguringkula rapa nyinanytjaku munu palula wanganarangku kulira warkarinytjaku, panya paluru wanka alatjitu nyinanyi witulya pulkanya.

¹⁵ Uwa, Christalu ara kutjupa wirkakatingu kuwaritja Godalanguru nganampa palumpa walytja tjutaku, nganana mulamularingkula Godalu kalkuntjitja mantjintjaku. Panya Godalu nganannya ngurkantara kalkunu palula tjungu titutjara nyinanytjaku. Palu nyangatjala mantjini nganampa anga-ilunyangka kutju. Panya ara nganmanyitjangkala nyinakatira putu kuliningi kura wantinytjikitjangku, palu panya

Jesunya nganampa ngalkilpa ilunyangka kutjula karalyarira wankaringu.

¹⁶⁻¹⁷ Ara nganampa alatji ngaranyi, panya nganana nyiringka walkatjura kalkulpai wanka nyinaralpi nyanga alatji ngayulu ilunyangka malangka uti ngayuku tjitji tjutangku mantjinma ngayulu kanyintja uwankara. Nyanga alatjila kalkulpai. Palu tjitji tjutangku ngayulu wanka nyinanyangka putu ngayuku uwankara mantjini panya nganana tjungu nyinanyi, palu kalkuntja nyanga paluru utiringkuku ngayulu ilunyangka kutju. ¹⁸ Ka nyanga palu purunypa ngarangi ara panya nganmanyitjangka, panya Godalu kalkuntja utiringangi kuka pungkunyangka kutju, palu kuka pungkuntja wiyangka wiyatu ngarangi. Panya kuka pungkula kutju milkali mantjira Godanya ungupai, ka nyara palulanguru kutju Godanya tjanampa kalyparingkupai.

¹⁹ Panya Moselu tjukurpa uwankara Godalu ungunytja tjanala wangkangu anangu panya uwankarangka. Munu palulanguru iluntanu puluka kulunypa, nanikuta kulunypa munu mantjira milkali minangka tjungunu. Munu palulanguru punu mina tjukutjuku mankurpa katantanu nyalpitjara munu karpira tjungunu nyalpi winki puturu tjitin-tjitinta. Munu punu panya nyalpi winki karpintjitja kukaku milkalingka tjalatjunu munu nyiri Godaku tjukurtjara kurpinu milkalingka, munu anangu uwankara kulu. ²⁰ Munu paluru wangkangu, “Nyawaya milkali nyangatja, panya Godalu nyuranya tjukurpa pulka tjuta

ungu nyura wanganarangku kulintjaku. Ka nyanga kukaku milkalingku nyuranya nintini panya tjukurpa nyanganpa kuwaringuru mangaranyi.” Alatji Moselu tjanala wangkangu mulamulangku kulintjaku. ²¹⁻²² Ka panya Moselu kukaku milkali katingu tiinta milmilpa unngu munu tiinta kurpinu munu unngu panya ngaranytja uwankara kulu. Panya Godaku tjukurtu alatji wangkanyi, “Milkalingka kurpinnyangka kutju kutjupa kutjupa uwankara palya ngarapai Godala mirangka. Ka panya milkali ilura tjutinyangka kutju Godalu anangu tjutangku kura palyantjitjanguru kaly pangku pungkuwiyangku wantipai.”

Christanya Milkali Tjutira Ilunyangka Kutju Godalu Nganananya Kaly pangku Wantipai

²³ Ka panya tiinta nyara palunya munu unngutja tjuta kulu tjana arkara palyanu nyara ngura ilkaritjanka ngaranytja purunypa. Ka wati tjukurtjarangku kukaku milkalingka kurpilpai tiinta munu unngu ngaranytja uwankara kulu Godala mirangka palya mulapa ngaranytjaku. Palu tiinta nyara ilkaritja kukaku milkalingku putu palyani. Wiya, Christaku milkalingku kutju ngura nyara palunya palyani nganana tjarpara Godala tjungu nyinanytjaku. ²⁴ Panya Christanya tjarpanytja wiya watingku palyantjitjanka tiinta panya milmilta. Nyaratja arkara palyantja ngura panya ilkaringka ngaranytja purunypa. Palu Christanya ngura ilkaritja mulata tjarpangu munu paluru Godala anga-wangkanyi nganampa ngalkiltu.

25-26 Palu wati tjukurtjara pulka kampa panya munkaritjangka milmilpa panya mulata waintara tjarpapai kukaku milkalitjara kuli kutjupa kuli kutjupa. Palu Jesulu yaaltjitu arangku palurunku ungu? Paluru wanyu rawa ilatu-ilatu ilukatingi kuwaripatjaranguru alatjitu panya Godalu manta palyantjalanguru? Wiya, ngula mulapa tjintu watalpi ilaringknyangka paluru pitjangu munu palurunku ungu iluntankunytjaku kutju-ara alatjitu Godanya nganampa kalyparingkunytjaku.

27-28 Anangu uwankara kutju-ara ilunytjaku ngaranya. Ka ilunyangka malangka Godalu nganannya ngurkantankuku. Ka panya palu purunypa nganaa kura palyantjitjanguru Christanya kutju-ara ilungu nganampa ngalk-
ilpa. Uwa, paluru walytja intjanuringu iluntankunytjaku Godalu nganannya kalypangu pungguwiyangu wantinytjaku. Munu paluru ngula malaku pitjala piruku kuranguru ilunytja wiya anangu panya palumpa patara nyinanytja tjuta wankaru katiku.

10

1 Tjukurpa panya Godalu Mosenya tjananya ungunytja, nyara paluru ngatalpa ngaranya ruwa nguwanpa. Panya tjukurpa paluru kuranyukutungku nintiningi ara kutjupa wiru mulapa Godalu kalkuntjitja. Palulanguru, ngatalpa ngaranyangka, Moseku tjukurtu anangu tjuta putu tjukarurulpai tjana Godala mirangka palya ngaranytjaku. Panya tjukurpa paluru wangkapai Godanya ilaringkula

walkuntjikitjangku kuka katira pungkula ungunytjaku palunya. Palu nyanga alatjiya rawangku kuli kutjupa kuli kutjupa ungkula ungkula putu tjukarururingangi munuya kura winkitu ngarangi Godala mirangka.

2 Tjinguruya kuka ungkula tjukarururingkulampa Godala mirangka palya ngarama kuntaringkuwiya munuya palulanguru tjinguru kuka piruku katinytja wiya ngarama palyaringkunytjatjanungku. Palu tjana ungkula palyaringkunytja wiya munuya rawatu kuranguru kuntaringangi Godala mirangka, 3 munuya kuli kutjupa kuli kutjupa ungkula rawangku kuliningi panya tjana kura palyanttjatjanungku. 4 Panya nanikutaku pulukaku milkalingku Godanya putu kalypalpai paluru nganananya kura palyanttjitjanguru pungkuwiyangku wantinytjaku.

5-6 Ka palulanguru Christalu mantakutu pitjanytjikitjangku wangkangu alatji Godala, “Nyuntu mukuringkunytja wiya anangu tjutangku nyuntunya rawangku kuka katira ungunytjaku.

Panya tjana kuka pitjilpangka tjunkula katu kurkaltjura wantipai kampara mulururinytjaku nyuntu tjanampa kalyparingkunytjaku.

Palu nyanga kuka pungkunytjitjanguru nyuntu pukularipai wiya.

Panya nyuntunin witunu anangurira ilunytjaku.

7 “Kana palulanguru nyuntula wangkangu, ‘Uwa, nyangatjana ngaranyi ngayulu nyuntu

witunnyangka wanganarangku kulira palyantjikitja nyuntu mukuringkuntja uwankara.

Panya alatjiya iriti walkatjunu nyiringka, ngayulu nyanga alatjirinytjaku.’ ” *

Nyanga palunya Christalu wangkangu Godala.

⁸ Palu ara Godalu Mosenya ungkunyjtjangku wangkangu alatji kuka mai katira palunya ungkunyjtjaku, kaya wanganarangku kulira palyanigi. Ka panya Christalu wangkangu, “Nyanga palumpa Godanya pukularinytja wiya, munu paluru kuka katira palunya ungkunyjtjaku mukuringkuntja wiyatu.” ⁹ Munu palulanguru wangkangu Godala, “Uwa, nyangatjana ngaranya ngayulu nyuntula wanganarangku kulira palyantjikitja nyuntu wangkanyangka.” Alatji Christalu Godala wangkangu. Ka nyura kulini nyanga palunya? Panya Godalu ara irititja wiyanu munu kutjupalta tjunu kuwaritja palumpa katjawanungku.

¹⁰ Panya Jesulu wanganarangku kulira palyanu Godalu wangkanyangka, ka nyara palulanguru Godalu nganannya kura palyantjtjanguru kalypangku wantingu pungkuntja wiyangku. Panya palumpa katja walytja alatjitu intjanuringu munu nganampa ngalkilpa kutju-ara ilungu. Ka nyara palulanguru nganana Godala mirangka kunta wiya kalyparingkula nyinanytjaku ngaranya.

¹¹ Panya wati tjukurtjara tjutangkuya rawangkutu tjintu kutjupa tjintu kutjupa kuka pungkula Godanya ungkupai anangu tjutangku

* **10:7** Psalm 40:6-8

kura palyantjitjanguru. Palu anangu tjutaya rawatu kunta ngarapai Godalu tjananya kura palyantjitjanguru pungkunytjaku patara. Panya tjukurtjara tjutangku kuka pungkula Godanya ungkula palunya putu kalypalpai paluru anangu tjuta pungguwiyangku wantinytjaku. ¹² Palu Jesunya walytja intjanuringu kutju-ara alatjitu ilura, munu palula malangka paluru wankaringkula anu munu nyinakatingu Godala itingka mayatja pulka mulapa. Panya paluru kutju-ara ilunytjatjanungku Godanya kalypanu, ¹³ munu paluru kuwari patara nyinanyi Godalu palumpa mirpantju tjuta tjaruntjaku tjanala waintarira mayatja pulka mulapa nyinanytjikitjangku.

¹⁴ Uwa, paluru kutju-ara ilura anangu uwankara kutju kutju palulakutu pitjanyangka kuranguru piranmanu palula tjunguringkula titutjara kalypa nyinanytjaku. Panya palunya tjananya Godalu ngurkantanu palumpa walytjaringkunytjaku. ¹⁵ Ka Kurunpa Milmiltu tjukurpa nyanga palunyatu ngananala tjakultjunanyi, panya paluru alatji wangkangu, ¹⁶ “Nyangatja ara kuwaritja ngayulu ngula nintilku.

Panya ngayulu ngayuku tjukurpa tjanala unngu nintilku tjana ara nyanga palunya pina alaringkula tjukarurungku kulintjaku.”

¹⁷ Ka piruku Godalu nyangatja wangkangu, “Ngayulu tjana kura palyantjitjaku watarkuriku alatjitu piruku kulintja wiya.” *

* **10:17** Jeremiah-ku 31:33-34

18 Uwa, paluru anangu tjutaku kalyparingu munu tjananya kura palyantjitjangu kaly-pangku wantipai. Kala wanyu Godanya kuka rawangku katira ungama nganampa kalyparingkuny^tjaku? Wiya, ara panya nganmanyitja wiyaringu panya paluru alatjitu nganampa kalyparingu.

Uti Raparingkula Godala Titutjara Tjungu Nyinama

19 Uwa, walytja wiru tjuta! Nyanga palulangurula uti raparingkula Godala junguringama, panya Christalunku milkali palumpa tjutira alanu nganana Godaku ngura milmilpa mulata rapa tjarpanytjaku. ²⁰ Panya Jesunya ilunyangka kutju mantara panya timpulangka waraly-waralyngaranytjanya tjilpiraranu munu alaringu ngura panya milmilpa mulata nganana waintara tjarpanytjaku. Nyangatja paluru ilura iwara kuwaritja palyanu wankakutu Mamala junguringkula wankaru nyinanytjaku. ²¹⁻²² Kala uti raparingkula Godala ilaringama, panya Jesulu tjukurtjara pulkangku Godaku ngura milmilpa kanyini. Munu panya paluru nganananya kurunpa paltjinu Jesulu palumpa milkalingka nganana kunta wiya nyinanytjaku, munulanya piranmanu kapi kal^tara wirungka palumpa walytja mulapa nyinanytjaku. Kala uti alatjinkunyangka kurunpa winki pukularira Godala ilaringama palumpa pulkara mulamularingkula kutju. ²³ Munula uti mulamularingkula Godaku ala-alangku patanma panya

paluru nganananya kalkunu wirura kanyintjik-itjangku munu palumpa ngurakutu katinytjik-itjangku. Kala uti tungun-tunguntu kulinma watarkurinytja wiyangku titutjarangku, panya Godalu ngunti kalkulpai wiya tjukarurungku kutju wangkapai.

²⁴ Wanyula kulinma wirura nyinanytjikitjangku, munulanku wituwitonma anangu uwankaraku pulkara mukuringkunyitjik-itjangku, munulanku ngaltunyitjungku alpamilantjikitjangku kulinma. ²⁵ Munula uti Godanya walkuntjikitja rawa tjunguringama, panya kuwari nyura kutjupatjara ngurangka nyinapai tjunguringkunyitja wiya. Palu wanyuya Tjintu Malatja kulinma panya watalpi ilaringanyi Jesunya malaku pitjanyitjaku, kalanku uti uwankara rawatu tjunguringama munulanku kunpunma Christanya titutjarangku wanantjikitjangku.

²⁶⁻²⁷ Ka nganana panya ninti Christaku munu palumpa tjukurku kulu. Palu tjingurula nyan-ganpa kulira wantira kura titutjarangku palyan-nyangkampa Godanya yaaltjingara nganampa piruku kalyparingkuku? Wiya, panya Christanya nganmanypa ilungu, ka kutjupa munkara palu purunypa ngaranytja wiya nganampa kuranguru piruku ilunytjaku. Kala yaaltjiriku palunya wantirampa? Wiya kutju nganampa ngaranyi panya nganana ngulu-ngulu patara nyinanytjaku Godalu nganananya ngula ngurkantara tjarantjaku Tjintu Malatjangka. Panya Godanya pulkara mirpanariku palula tungunpungkupai tjutaku munu paluru tjananya

wiyalku, panya waru pulkangku kampara nyarulpai, palu purunyaju uwankara wiyalku.

28-29 Panya anangu kutjupangku Moseku tjukurta tungunpungkunyaangka palunya pungkula iluntankunytjaku ngarapai. Panya anangu kutjarangku, tjinguru mankurtu, anangu palunya tungunpungkunyaangka nyakula wati mayatjanga tjakultjunkupai, ka palunya iluntankunytjaku wangkapai ngalturingkunyaja wiyangku. Palu anangu kutjupangku tjinguru Godaku katja anannyangkampa Godalu palunya tjituru-tjituru pulka mulapa palyalku. Munu tjinguru paluru Jesunya milkali tjutinyaja nguntinmankunyaangka Godalu palunya mapalku alatjitu pungkuku. Munta tjinguru paluru Godaku Kurunpa ngaltunytjunya analku, ka Godalu palu purunypatu palunya pungkuku. Panya anangu nyara palumpa alatjitu Jesunya ilura tjutingu milkali, ka nyara palulanguru Godanya palumpa kalyparingu ara nyanga kuwaritjanga. Ka paluru ara nyanga palunya tungunpungkula wantinyangkampa Godalu wantinyaja wiyangku palunya pungkuku.

30 Panya nganana ninti Godalu alatji wangkangu, “Ngayuku ara ngaranyi, panya anangungku ngayula tungunpungkunyaangka ngayulu palunya pikantankunytjaku ngaranyi.” Munu piruku paluru wangkangu, “Ngayuluna tjukarurungku ngurkantara tjaralku ngayuku walyaja tjuta.” 31 Kaya wanyu kulinma! Godanya wanka alatjitu nyinanyi witulya pulkanya munulanya paluru kuwari nyanganyi. Kala

wanyu ngulu-ngulu nyinama anannyangka pitjala nganannya pungkunytjaku-tawara.

³² Kulilaya panyatja, panya nyura nganmanypa Jesuku walytjaringkunyutja Godalu nintinnyangka. Nyara palula arangka panya kutjupa tjutangu nyuranya pulkara kurara pungangi, ka nyurampa ara wituwitu mulapa ngarangi. Palu ara nyara palulawanungku nyura tungun-tunguntu Jesunya wanangingi wantinytja wiyangu. ³³ Panya kutjupa-ara tjana anangu tjutangka mirangka nyuranya anara kurara pungkupai. Munu tjana Jesuku walytja kutjupa tjuta kulu palu purunymankupai. Palu nyura panya palunya tjananya nyakula nguluringkula paturingkunyutja wiyangu wantira palula tjanala junguringangi.

³⁴ Munuya Jesuku walytja kutjupa tjuta tjailangka tjunkunyangka nyura panya ngalturingkula tjananya wirura kanyiningi. Munu panya kutjupa tjutangu nyurampa ulytja uwankara tjulyara katinyangka nyura pukulpa nyinangi tjanampa mirpanarinytja wiya, panya nyura nintingu kulinigi, “Ngayuku pukulpa kutjupa ngaranyi mantangurutja wiya palu Godalanguru, paluru kalkuntjitja. Ka pukulpa nyara paluru wiyaringkupai wiya titutjara ngarapai.”

³⁵⁻³⁶ Uwa, nyura panya Christanya rawangku rapangku wanangingi, palu pakuringkunyutja wiyangkuya wantima. Panya Godalu nyuranya kalkunu wiru ungunytjikitjangku nyura rawangku rapangku wanannyangka. Kaya tungun-tunguntu wanama, munuya palulan-

guru Godala wanganarangku kulirampa nyura Godalu kalkuntjitja mantjilku alatjitu.

³⁷⁻³⁸ Panya nyiringka iriti walkatjunkunytja alatji ngaranyi,

“Paluru kalkuntjatjanu mulapa pitjaku alatjitu kuwari nguwanpa, rawa ma-nyinanytja wiya.

Kaya ngayuku walytja tjuta mulamularingkula titutjara nyinaku,

palu tjinguruya ngayulanguru paturingkunyaangka ngayulu tjanampa pukularinytja wiya.” *

Nyanga palunya Godalu wangkangu.

³⁹ Ka nganaṅa Godanya wanarampa paturingkunytja wiya panya anangu kutjupa tjuta purunypa wiya, panya tjana Godanya wantira ma-paturingkula kawankatipai mirikutu alatjitu. Palu nganaṅa rawa mulamularingama Godaku, kalanya wankaru kanyilku.

11

Godaku Mulamularingkunytja

¹ Palu nyaa Godaku mulamularingkunytja? Wiya, panya anangu Godaku mulamularingkunytja nyanga alatji panya paluru rapangku kulin-tjatjanungku nyinara patani Godalu kalkuntjitja utiringkunytjaku. Paluru panya putu nyanganyi kurungku Godalu kalkuntjitja wirkankunytjaku, palu paluru nitingku kulini, “Mulapa paluru kalkuntjatjanungku palyalku alatjitu.” ² Panya

* **10:37-38** Apakukaku 2:3-4

iriti Godaku walytja tjuta palumpa mulamularingkunyangka Godanya tjanampa pulkara pukularingi.

³ Ka nganana Godaku mulamularingkula nintingku kulini panya paluru ilkari manta kulu wangkara palunu. Kala nyanganyi paluru paluntjitja uwankara, palu putula nyanganyi yaaltjinguru paluntja, panya paluru arkayitjan-guru palunu wangkangu kutju.

⁴ Uwa, wanyula kulinma anangu irititja tjuta Godaku mulamularingkupai tjuta.

Abelnga

Panya Godaku mulamularingkula Abeltu tjukarurunku kuka pungkula ungu Godanya palumpa kutangu Kaintu purunypa wiya. Ka Godanya palumpa pukularingu munu Kainnga wantingu munu paluru mulamularingkunyangka wangkangu Abelnga, “Nyuntu ngayula mirangka tjukaruru ngaranyi.” Palu Abelnga iriti mulapa ilungu munu paluru nganananya kuwari nintini Godaku mulamularingkunytjaku.

Iinakanya

⁵ Ka Godaku mulamularingkula Iinakalu palunya pukulmanu, ka Godalu palunya wanka katingu. Panya nyiringka ngarinyi alatji, “Godanya pukularingu palumpa munu ilunytja wiya wanka katingu.” Kaya anangu tjutangku palunya putu nguriningi Godalu palunya katinyangka. ⁶ Palu ngayulu tjinguru Godaku mulamularingkunytja wiya nyinarampa palunya putu pukulmananyi. Panya ngayulu Godalakutu

ilaringkunytikitja mukuringkulampa uti palumpa mulamularingama panya paluru mulapa nyinanytitjaku, mununa uti ngayulu mulamularingkula kulinma panya mulapa paluru anangu tjutaku wiru mulapa palyalpai palulakutu pitjanyangka.

Noah-nya

⁷ Ka Noah-lu Godaku mulamularingkula pauta pulka palyanu, panya Godalu palula nganmanytju wangkangu mina pulka mulapa iyantjikitjangku, mina panya tjana nganmanytju nyakunytja wiyatja. Ka paluru Godala kulintjatjanungku pauta palyanu munu walytja tjutatjara uru pulkangka-tawara tjarpara wankarringu. Kaya anangu tjutangu Noah-nya purunypa mulamularingkunytja wiyangu wantingi, munuya Noah-nya wankaringkunyangka wiyaringu alatjitu kura nyinanytatjanu. Palu Noah-nya Godaku mulamularingkunyangka Godalu palunya walytjanmara wangkangu, “Mulapa nyuntu ngayula mirangka tjukaruru ngaranyi.”

Aipuramanya

⁸ Ka panya Aipuramanya Godaku mulamularingkula parari anu ngura ngurpatjakutu. Panya Godalu ngura palumpa wantikatira ankunytjaku alatji wangkara kalkunu, “Ngayuluna ngura kutjupa nyuntunya ungkuku.” Ka Godalu wangkanyangka paluru kulira wanganara pakara watarku anu munu putu kulinigi, “Yaaltjikutuna nyangatja ananyi?”

9-10 Munu paluru Godaku mulamularingkula malikitja purunypa nyinangi tiinta palyara ngura panya kalkuntjitjangka wirkara. Ka palumpa katja Isaacanya munu palumpa pakali Jacobanya kulu ngura nyara palula wirkara nyinangi, panya Godalu tjananya kulu kalkunu ngura nyara palula nyinanytjaku. Palu Aipuramanya tiintangka pukulpa nyinangi malikitja purunypa ngura panya palula panya paluru nintingku kuliningi, “Nyangatjana unytju nyinanyi ngura nyanga mantangka, panya Godalu ngura kutjupa pulka palyanu ngayuku wiru mulapa, kana ngura nyara palumpa patara nyinanyi. Ka ngura nyara paluru panya kampa kutjuparinytja wiya palurutu ngaraku titutjara.”

11-12 Munu paluru Godaku mulamularingkula tjitji utinu, panya paluru wati tjilpi ka palumpa miita Tjiiranya minyma pampa iti putu kanyilpai. Palu panya Godalu kalkunu tjitjiku, ka Aipuramanya mulamularingu palumpa panya paluru tjukarurungku wangkapai. Uwa, Aipuramanya panya wati tjilpi nyinangi tjitji putu utilpai, palu palula kutjunguruya walytjapiti mungilyiringu kililpi ilkaritja tjuta purunypa, munu paki kuluny-kulunypa tjuta panya karungka ngarinytja purunypa, mungilyi mulapa.

13 Uwa, wati panya paluru tjana munu Aipuramanya tjana kulu Godaku rawa mulamularingangi titutjara wiyaringkunyitja wiya ilunytjakutu-wangkara. Palu panya tjana wanka nyinara mantjintja wiya Godalu panya kalkuntja. Palu tjana nganmanytju

kuliningi ngula utiringkunytjaku munuya pulkara pukularira wangkangi, “Nganana unytju akatjari mantangka nyanga nyinanyi.”
¹⁴ Ka panya tjana alatji wangkanyangka nganana kulilpai, “Munta-uwa, tjana nyinara pataningi ngura kutjupaku.” ¹⁵ Tjinguru wati nyangantu ngura tjananku wantikatinytjatjanu kulira watjilarima, munuya mukuringkula malaku wantira anama. ¹⁶ Palu wiya, paluru tjana ngura nyara palunya kulintja wiya panya tjana ngura kutjupaku mukuringangi ngura wiruku, panya ilkaritjaku. Ka palulanguru Godanya palunya Mama walkunnyangka tjanampa pukularipai kuntaringkunytja wiya, panya paluru tjanampa ngura pulka mulapa palyanu.

¹⁷⁻¹⁹ Ka Aipuramalu Godaku mulamularingkula katja palumpa Isaacanya katingu iluntara Godanya ungkunytjikitjangu. Panya Godalu palula wangkangu arkara nyakunytjikitjangu wanganarangku kulinnyangka. Palu panya nganmanytju Godalu Aipuramanya kalkuntjitja ngarangitu palumpa katja Isaacalanguru walytjapiti tjutaringkunytjaku. Ka nyara palulanguru paluru katja palumpa iluntankunytja kuwaripangka kuliningi, “Godalu mulapa ilunyangka wankalku.” Ka Godalu mulapatu ungu palumpa katja malakungku. Panya wati ilunyangka Godalu wankalpai, palu purunypa Godalu palunya nguwanpa iluntankunyangka wankanu.

Isaacanya

20 Ka Isaacalu Godaku mulamularingkula katja kutjara pukulmanu Jacobanya pulanya Iitjunya alatji kalkura, “Panya Godalu nyupalimpa wiru tjuta ngula palyalku.”

Jacobanya

21 Ka Jacobalu Godaku mulamularingkula palu purunytjutu pukulmanu palumpa katja tjuta alatji wangkara, “Panya Godalu nyurampa wiru tjuta ngula palyalku.” Alatji paluru nganmanytju wangkangu malangka ilunytjikitjangu. Munu paluru patany-patanytju ngarala tjukatjarangu walkuningi Godanya.

Josephanya

22 Ka Josephalu Godaku mulamularingkula nintingu kuliningi panya Israelkunu tjutangku ngula ngura Itjipanya wantikatiku. Munu tjilpiringkula paluru palumpa walytja tjutangka utingku wangkangu nguwanpa ilura palunya tarka ngula katinytjaku Itjipalanguru Israeltakutu.

Mosenya

23 Ka Moseku ngunytjungku mamangu Godaku mulamularingkula palunya kutitjunu pira mankurpa iti wirkankunyangka. Panya Itjipaku mayatjangu Piiralu palumpa tjaultji tjutangka wangkangu iti nyitayira tjuta iluntankunytjaku. Palu mamangu ngunytjungku pula nguluringkuwiyangu kutitjunu iti panya palunya, panya paluru pula nintingu ngurkan-tanangi, “Iti nyangatja wiru mulapa.”

24-26 Ka ngula Mosenya pulkaringkula paluru kulu Godaku mulamularingkula Mayatja Piiraku ngura wantikatira palumpa walytja tjutakutu anu. Panya paluru alatji kuliningi, “Tjinguruna Piiraku walytja tjutangka tjungu rawatu nyinarampa ngayulu Godaku watarkurira kura tjuta unytjungku kutju pukularira palyanma. Palu ngayulu tjananya wantikatira Godaku walytja tjutangka tjunguringkula pikangka alatjitu nyinanyi panya Itjipanya ngurara tjutanku nganananya kurara punganyi. Tjinguruna Itjipanya ngurara tjutangka tjungu nyinarampa kutjupa kutjupa wiru tjuta mantjinma. Palu ngayulu wantira pikawanu nyinanyi ngayuku walytja tjutangka tjunguringkula, panya ngananalanguru mayatja pulka ngula utiringkuku nganampa wankarunkupainya.” Uwa, Mosenya nyanga alatji nyinangi panya paluru piruku kutjupa munkaritja kuliningi ngula Godalu kalkuntatjanungku ungkunyjtaku.

27 Munu piruku Godaku mulamularingkula Moselu ngura Itjipanya wantikatingu. Panya paluru nguluringkunyjtja wiya Mayatja Piiranya palumpa mirpanarinyangka. Paluru tunguntunguntu wananingi Godanya uti nyakula purunytju. Palu kurungku nyakunyjtja wiya unngu kutju mulamularingangi.

28 Munu Godaku mulamularingkula Moselu wangkangu anangu tjutangka kukaku milkalingka wali tjananku tuwa urilitja nyitintjaku angeltu pitjala nyakula katuwanu ankunyjtaku tjanampa katja nganmanyitja tjuta

iluntankunytjaku-tawara. Nyara palula arangka paluru palyanu inmangka tjungurinkula angelpa katuwanu ankunytjanya rawangku kulintjaku.

²⁹ Kaya Godaku mulamularingkula Mosenya tjana anangu tjuta kulu ngura uru ini Tjitin-tjitinta ngururwanu itipiringu manta piltingka. Kaya wati panya Itjipanya ngurara tjutangku tjananya malawanungku wataparara urungka ngururpatu ilungu urungku malakungku tjananya tjutunnyangka.

Tjatjuwanya Tjana

³⁰ Ka Tjatjuwanya tjana Israelkunu tjuta kulu Godaku mulamularingu munuya Godalu wangkanyangka wanganarangku kulira tawunu panya Jerichola tjintu 7-ara para-arintanangi, ka wall panya pulka para-arintara ngaranytja pilukatingu.

Rayapanya

³¹ Ka minyama panya wati tjutangka kampangkatu ngaripainya ini Rayapanya Godaku mulamularingkula wankaringu. Panya pilukatinytja kuwaripangka Tjatjuwalu wati kutjara iyanu Jerichola tjarpara kampangkatu para-nyakula malaku pitjala tjakultjunktjaku. Ka pula Jerichola wirkankunyangka, Rayapalu palunya pulanya Jerichonya ngurara tjutaku ngulungku mantjira kutitjunu palumpa ngurangka iluntankunytjaku-tawara. Nyara palulanguru paluru wankaringu, panya malangkalta Israelkunu tjutangku

Jerichonya ngurara kutjupa uwankara iluntanu Godanya kulira wantinyangka.

Godaku Mulamularingkupai Tjuta Iriti Nyinanytja

³² Wanyuna piruku nyurala tjakultjunkuku anangu mulamularingkupai kutjupa tjuta? Wiya wanti, panya tjuta mulapa ngaranyi wangkara wiyantjaku wiya, panya Kitiyannga, Parakanya, Samsongga, Tjaipatjanya, Davidanya, Samuelnga munu wangkatjara kutjupa tjuta kulukulu panya winki mulapa.

³³ Wati nyanga paluru tjana Godaku mulamularingkula ngura walytjangku angakanyiningi warmalangku pitjala tjulyantjaku-tawara ngura kutjupitja tjutangku. Munuya ngura tjananku tjukarurungku kanyiningi anangu tjuta pukulpa palya nyinanytjaku. Munuya nyangangi Godalu panya kalkuntjitja tjuta utiringkunyangka.

Panya kutjupa tjutangku Godaku mulamularingkula lion tjuta tjaa patiningi patjantjaku-tawara. ³⁴ Kaya tjara kutjupa Godaku mulamularingkula waru pulkangka wankaru ngarangi kampanytja wiya. Kaya kutjupa tjuta Godaku mulamularingkula wankaringangi tjananya tjulangka wakara iluntankunytjikitjangku arunnyangka. Kaya kutjupa tjuta upa ngarala Godaku mulamularingkula kunpuringangi. Kaya tjaultji tjuta Godaku mulamularingkula witulya pulkatjararingkula warmala ngura kutjupitja tjuta pika pitjanyangka pungkula wiyaningi.

³⁵ Kaya minyma tju^u tangku purkutjararingkula Godaku mulamularingkula nyangu Godalu tjanampa tjitji malakungku wankannyangka.

Kaya tjara kutjupa Godaku mulamularingkula ilungi, panya mirpantju tju^u tangkuya tjananya nguluningi wangkara, “Nyura Godanya wantinyangkala nyuranya walatjunkuku iluntankuntja wiyanku.” Kaya kuliningi, “Wiya, nganana Godanya wantinytja wiya. Palyantilanyaya nganananya pungkula iluntanama panya Godalu nganananya wankalku palula tjungu wanka mulapa titutjara nyinanytjaku.” Alatjiya kuliningi, kaya mirpantju tju^u tangku tjananya pu^u ngulutjingara pungkula iluntanangi. ³⁶ Munuya mirpantju tju^u tangku Godaku walytja kutjupa tjuta ananangi, munuya wiipangka alkanangi, munuya kutjupa tjuta tjiinangka karpira tjailangka tjarpatjura kanyiningi. ³⁷⁻³⁸ Munuya kutjupa tjuta pulangka atura iluntanangi, munu kutjupa tjuta wanka winki kultu karilpa katara kutjaranangi, munuya kutjupa tjuta wakara iluntanangi tjula pulkangka.

Kaya tjara kutjupangku tjiipiku nanikutaku miringuru ulytja palyara tjarpangi munuya ngaltutjara tjuta purunypa para-ngarangi mani wiya mai wiya pal^u t^u jatjiratja alatjitu. Kaya anangu tju^u tangku tjananya nyakula analpai munu kurara pungkupai. Panya tjanaya mantatjaku mukuringkula pu^u ngurkantanangi palya mulapa nyinanyangka. Kaya tjana ilytjingka waara para-ngarangi pilangka puli

katu kulukulu. Munuya kulpingka pitingka
kulu nyarkara nyinangi.

39-40 Ka Godanya pulkara pukularingi anangu
nyanga palumpa tjanampa, panya tjanaya
palumpa pulkara mulamularingangi. Palu
panya Godalu kalkuntja tjana nyakunytja
wiyatu munuya nganmanypatu ilungi
palumpa mulamularingkula kutju. Panya
Godalu nganmanytju nganampa palyara
wantingu wiru mulapa. Panya paluru
mukuringangi nganananya tjanala tjungura
wirura palyarungura kanyintjikitja palumpa
mulamularingkupai uwankara.

12

Godanya Nganampa Mama Nyinanyi munu Ngarananya Tjukarurulpai

1-2 Ka tjana kuwari nganananya ngarala
nyanganyi winkingku Godaku mulamula-
ringkupai miri tjutangku. Kala nganana
kulu uti Jesunya tungun-tunguntu wananma.
Panya watingku paluru-warara wirtjapakara
wirkankunytjikitjangku mantara arara
tjunkupai tarpipungkula punkatjingantjaku-
tawara. Palu purunypala uti kura kutjupa
kutjupa uwankara wantira Jesunya wananma
pakuringkunytja wiyangku titutjarangku
ilunytjakutu-wangkara. Panya Jesulu iwara
alanu nganana kulu Godala wirkankunytjaku
munulanya alpamilani pakuwiyangku palunya
wanantjaku munu panya paluru patani

ngura nyara palula nganaṅa ngapartji ma-wirkankunytjaku.

Ka panya kutjupa kutjupa tjuṅanku mantatjangku nganaṅanya angatjungkunyangkala uti wantima munula titutjarangku Jesunya wanaṅma. Panya paluru pakuringkunytja wiyangku palumpa Mamaku palyanigi munu puṅu katakutjarangka ilunytjikitja nguluringkunytja wiya. Ka panya anangu tjuṅanku palunya ananigi wati kura-palku kulira.* Palu paluru rapa alatjitu ilungu panya paluru waintara kuliningi palumpa Mamangku palunya pukulpa pulka mulapa ungkunytjaku. Munu alatji palyantjatjanu paluru kuwari Godala itingkalta nyinanyi mayatja pulka mulapa. ³ Ka nyura uti palunya kulira raparingama, panya Jesunya mantangka nyinanyangkaya anangu kura tjuṅanku palunya pulkara kuraningi munu ananigi, ka paluru tungun-tunguntu alatjitu ngarala palyanigi palumpa mamangku wituntjitja pakuringkunytja wiyangku. Ka nyuranya palu purunypatu kurannyangka Jesunya kulinma, munuya palu purunypatu tungun-tungunpa ngarama tjituru-tjitururira wantinytja wiya.

⁴ Uwa, anangu kura tjuṅanku nyuranya arkara kurani Godanya wantinytjaku, ka panya nyura tungun-tunguntu tjananya kulira wantinyi. Palu tjana nyuranya Jesunya purunypa pungkula iluntankunytja

* **12:1-2** Ngura nyara palula anangu tjuṅanku kulilpai wati kura tjata kutjuya iluntankupai puṅu katakutjarangka.

wiya palunya wanannyangka. Tjinguruya nyuranya ngula pungkula iluntankuku rawanku wanannyangka. ⁵ Palu tjinguru nyura watarkuringu nyiringka panya iriti walkatjunkunytjitjaku. Panya tjukurpa paluru ngaranyi nganana kulira raparingkunytjaku, panya Godalu katja tjuta paintja nyanga alatji ngaranyi,

“Kulila! Mayatja Godalu nyuntunya tjitji purunypa tjukarurulpai palulawanu nyinanytjaku,

kan uti palula wanganarangku kulinma panya paluru nyuntunya ngunti palyannyangka pailpai.

Uti nyuntu kuranguru painnyangka kulira tjituru-tjitururinytja wiyanku wantima.

⁶ Panya paluru pulkara mukuringanyi palumpa katja untalpa tjutaku, munu pala palulanguru tjananya tjukarurulpai, munu kuraringkunyangka tjananya pungkupai tjana tjukaruru nyinanytjatjiratjangku.” *

⁷ Kulini nyura? Nyurampa kutjupa kutjupa wituwitu ngaranyangkaya mirpanariwiyanku Godanya kulinma panya paluru nyuranya Mama wirungku tjukaruruni. Panya wati mamangku palumpa katja tjukarurulpai, palu purunypatu Godalu tjukarurulpai palumpa tjitji tjuta. ⁸ Palu tjinguru ngayunya Godalu wantima tjukaruruntja wiyanku, kana palulanguru

* 12:6 Proverbs 3:11-12

kulilku, “Munta, tjinguruna ngayulu palumpa tjitji wiya, mungutja, mamatjara wiya.” Panya Godalu palumpa tjitji uwankara tjukarurulpai kutjupa tjuta wantinytja wiyangku.

⁹⁻¹⁰ Panya nganana tjukutjuku nyinanyangka nganampa mama tjutangku nganananya tjukaruruningi tjana wiru kulintjatjanungku mama panya mantatja tjutangku. Kala tjana wangkanyangka nganana wanganarangku kulinigi. Palulangurula uti Mama ilkaritjangka ngapartji pulkartu kulinma mulamulangku palula tjungu pukulpa nyinanytjikitjangku. Panya paluru nganananya alpamilantjikitjangku tjukaruruni nganana kulira palunya purunypa tjukarurula mulapa nyinanytjaku.

¹¹ Ka panya Godalu nganananya tjukarurunnyangka nganana pukularinytja wiya kulira tjituru-tjitururipai. Palu utila kulinma panya Godalu nganananya tjukaruruni palya mulapa nyinanytjaku, kala palulanguru nganana nintiringkula pukulpa nyinapai tjukarururingkula.

¹² Uwa, kulinmaya nyangatja munuya kunpungku tungun-tunguntu Jesunya wananma. Tjinguru nyura mara walpa-walparingkula muti tjititinkula pakuringanyi, palu paku nyanga palunya kulintja wiyangku wantira Jesunya rawangku tungun-tunguntu wananma. ¹³ Munuya tjukaruru titutjara nyinama kurunpa uparingkula punkantjaku-tawara, panya nyura tjukaruru nyinara kunpuringkula witulya ngaraku.

Godanya Kulira Wantinytjaku-tawara

14 Rawangkuya kulinma mirpantju wiya kalypa nyinanytjikitjangku munuyanku pulkara arkanma Godalawanu wirura tjukaruru nyinanytjikitjangku. Panya nyura tjukaruru wiya nyinarampa Mayatjanya putu nyakuku. 15 Godanya panya ngaltunytju mukulya pulka, ka nyuranku uti pulkara atunymanama Godalanguru paturingkula punkantjaku-tawara. Munuyanku ngulu nyangama anangu kutju nyuralanguru kuraringkunyjtaku-tawara, panya paluru tjinguru alatjirira nyuranya uwankara kuralku.* 16 Munuyanku atunymanama kuri walytjatjarangka ngarinytjaku-tawara panya alatji wiru wiya. Munuyanku anga-nyangamatu wati panya Iitjanya purunyarinytjaku-tawara panya paluru Godaku watarkuringu palumpa mamanku Isaacalu palumpa kalkura pukulmankunyjtaku ngaranyangka, munu panya paluru tjinu kutjupa paltjatjiratjarira ngatjinu palumpa malanyangka Jacobala alatji wangkara, “Maini uwa, kanta nyuntunya Mamalu kalkura pukulmankuku ngayunya wiyangku.” Paluru kalkuntja panya wantingu maikitjangku, ka Isaacalu Jacobanya kalkura

* **12:15** Panya ukiri palya pakalpai, ka tjinguru ukiri kutjupa kutjupa tjuta unngu-unngu pakani munu panya paluru tjana pakara ukiri palya tjuta tjulkura iluntananyi, ka wiyaringanyi alatjitu. Kalanku nganana uti nyanga palu purunyarinytjaku-tawara ngulu nyangama.

pukulmanu Iitjuku arangka.^{*} 17 Ka nganana ninti panya paluru ngulalta malaku mukuringu kalkuntja panya palumpa munu palula putu ulara pulkara ngatjiningi mamangka, piruku palunya kalkuntjaku. Palu mamanku wantingu. Ka nyuranku wanyu anga-nyangama Iitjanya purunyarira Godaku ara wantinytjaku-tawara.

18 Panya nyura kuwari ara kutjupangka nyinanyi arkayitjanka, ara panya irititjanka wiya. Panya iritiya Israelkunu tjuta puli panya ini Tjaniyala wirkara nyinangi, munu panyaya nyangu puli panya palula waru pulka pinpanyangka, munu mungawaluru pulkanku tjutura ngaranyangka ngangkali maru pulkanku. 19-20 Munuya kulinigi turampata pulkara wangkatjingannyangka. Munuya Godaku wangka kulu kulinigi, panya paluru tjananya pulkara wangkangu alatji, “Puli nyangatjaya pampulwiyanku wantima. Munu kutjupanku pampunnyangka nyakulampaya palunya atura iluntanama, munu tjinguru kukanku pampunnyangka nyakulaya palunya kulu atura iluntanama.” Kaya anangu tjutanku kulira pulkara nguluringkula wangkangu, “Wiya, nyangatja wituwitu pulka mulapa. Wanyu piruku ngananala wangkanytja wiyanku wantima.” 21 Ka Moselu kulu nyanganpa uwankara nyakula wangkangu,

* **12:16** Uti Iitjulu kalkuntja panya palunya kulinma Godalu ungkunyitja. Palu paluru Godaku watarkuringu munu wantira palurunku walytjanku kutju kulinigi maingka paltjaringkunytjikitjanku. Tjukurpa nyangatja nyawa Genesis 27-ta.

“Tjititinganyina pulkara nguluringkula.”

²² Uwa, puli panya palulakutu nyura kuwari ankunytja wiyatu, palu nyura wirkanu puli kutjupangka puli ini Tjayanta, panya God wankaku ngurangka, ini kutjupa Jerusalemala ngura panya ilkaritjangka. Ka ngura nyara palula panya angelpa winki mulapa pukulpa alatjitu nyinara waninyi utulu kutju.

²³ Uwa, ngura pala palula nyura wirkanu Godaku walytja kutjupa tjutangka tjunguringkunytjikitja. Panya nyara palunya tjananya Godalu ngurkantara ini tjuta walkatjunu ngura panya ilkaritjangka titutjara nyinanytjaku. Uwa, nyura pitjangu God Ngurkantankupailakutu panya paluru anangu uwankara tjukarurungku ngurkantara tjaralku. Ka ngura nyara palula miri tjuta kurunpa nyinanyi panya tjana mantangka Godalawanu tjukaruru nyinangi munuya ilungu, ka Godalu tjananya wiru mulapa palyanu.

²⁴ Uwa, nyura pitjangu Jesulakutu panya paluru nganampa ngalkilarira ara kuwaritja palyanu paluru milkali tjutira. Panya paluru nganannya palumpa milkalingka paltjinu Godanya nganampa kalyparingkunytjaku. Uwa, Jesuku milkalingku wiru mulapa palyanu, Abelku milkalingku purunytju wiya.*

²⁵ Ka palulanguru nyura uti tungunpungkuwiyangku kulinma Godalu

* **12:24** Panya Kaintu Abelnga iluntankunyangka palumpa milkalingku mantangka tjutira mirara wangkangi ngapartji iluntankunytjaku. Palu Jesuku milkalingku tjutira wangkangi Godanya nganampa kalyparingkunytjaku.

wangkanyangka. Panya iriti paluru mantangka Israelkunu tjuangka wangkangi, kaya tungunpungkula palunya kulira wantingi, ka nyanga palunya tjananya Godalu pikantanangi, kaya pu tu kumpiningi wankakitja. Ka panya Godalu nganana ilkaringuru wangkanyangka uti ngana wanganarangku kulinma. Panya ilkaringuru wangkanyangka ngana kulira wantirampa, ka paluru mulapa nganannya pulkara pikantankuku, kala pu tu alatjitu kumpulku palulanguru. ²⁶ Panya iriti puli nyara Tjaniyala Godalu manta uritjinganu wangkanku wankara. Palu kuwari nyanga paluru kalkunu alatji wankara, “Ngayuluna kutju-aralta piruku manta ilkari kulu uritjingalku.” ²⁷ Kala nyanga palulangurulta kulini, “Mulapa Godalu kutjupa kutjupa uwankara paluru paluntja uritjingara wiyalku. Ka panya pu tu uritjingalpai tjuta titutjara ngaraku wiyaringkuntja wiya panya paluru kalkuntja munu palumpa ngura kulu ngaraku titutjara.”

²⁸⁻²⁹ Ka kutjupangku Godanya pu tu uritjingara wiyalku munu palumpa walytja tjuta kulu pu tu wiyalku. Panya Godalu ngura nganmanytju palyara wantingu nganampa palula titutjara nyinanytjaku. Palulanguru ngana uti Godaku pulkara pukularima, munula palunya tjkarurungku walkura pulkanmanama palumpa nguluringkula, panya paluru pulka mulapa munu waru pulka purunytju kura uwankara kampara wiyalpai.

13

Nyanga Alatjiya Nyinama Godanya Pukularinytjaku

¹ Uti nyura Jesuku walytja nyinarampa nyuranku rawa pulkara mukuringama watarkurinytja wiya. ² Munu nyura uti anangu ngura kutjupitja pitjanyangka nyakula papulankunytja wiyangku mantjira nyurampa ngurangka pukultu kanyinma. Panya iriti anangu kutjupangku anangu-palku angelpa mantjira kanyiningi palumpa ngurangka.* Ka nyura uti palu purunytjutu malikitja mantjira pukultu kanyinma nyurampa ngurangka.

³ Munu nyura uti tjailangka nyinapai tjuta kulu watarkuriwiyangku kulinma munu tjanampa ngalturingkula tjarpara tjananya alpamilanma.* Munuya Jesuku walytja kutjupa tjuta kulu kulinma panya anangu mirpantju tjutangku tjananya kurani. Pulkaraya tjanampa ngalturingama munuya tjananya alpamilanma.

⁴ Munu nyura uti kuritjarangku tjukarurungku kulinma munu palyanyku nyinama, munuya kuri altira wirura kanyinma. Uti nyura kuri walytjangka kutju ngarima walytjatjarangka ngarinytja wiya. Panya Godalu kura nyanga palu purunypa palyannyangka

* **13:2** Nyawa Genesis chapter 18-ta, panya Aipuramalu anangu-palku angelpa mankurpa pukultu mantjira tjunangi palumpa ngurangka. * **13:3** Panya iritiya tjailangka nyinangi mai wiya, kutjupa kutjupa wiya, tjituru-tjituru pulka, pikatjara pungkunytja pungkunytja. Kaya walytja tjutangku kutju mukuringkula tjarpara alpamilaningi.

nyakula ngurkantara wiyalku. Panya paluru anangu kampangkatu ngaripai uwankaraku pukularipai wiya munu tjananya ngurkantara wiyalku.

⁵ Munuya maniku pulkara mukuringkuwiyangku wantima. Palu panya nyura kanyintjitjakuya pukularima, munuya piruku waintara mantjintjikitjangku kulintja wiyangku wantima. Panya Godalu wangkangu alatji, “Ngayuluna nyuranya wantikatinytja wiya nyurala tjungu titutjara nyinaku.

Mununa nyuranya watarkurinytja wiyangku titutjarangku kanyilku.” *

Nyara palulanguru Godalu nyuranya rawangku kanyinnyangkaya maniku pulkara mukuringkunyitja wiyangku wantima. ⁶ Munu alatji wangkama kurunpa raparingkula, “Mayatjalu ngayunya atunymara kanyilpai kana ngulu wiya nyinanyi,

Kani ngayunya anangungku putu kurani.” *

⁷ Kaya kulinma wanyu tjana panya nyuranya atunymara kanyilpai tjuta, panya tjanaya nyurala tjakultjunu Godaku tjukurpa. Uwa, ara tjanampa kulinma panya tjana mantangka nyinaralpi Jesunya tungun-tunguntu wanangingi munu panyaya rapa alatjitu ilungu. Ka nyura nyangatja kulira uti tjananya arkanma munuya Jesunya titutjarangku wananna tjana purunytju. ⁸ Panya Jesunya Christanya kutju-pariwiya kuwari palurutu alatjitu nyinanyi. Panya paluru iriti mulapa nyinangi, munu kuwari

* **13:5** Deuteronomy 31:6 * **13:6** Psalm 118:6

palurutu nyinanyi, munu palurutu titutjara nyi-
naku wiyaringkunytja wiya alatjitu.

⁹ Palu kutjupa tjutangku nyurala tjukurpa
kutjupa kutjupa tjuta ngunti wangkara nintin-
nyangkaya kulira wantima ngunti iwara kutju-
pangka katinytjaku-tawara. Panya nganana
kurunpa kunpuringkupai Godalu nganana
ngaltunytjungku rapannyangka kutju. Palu
nganana kuka mai kutjupatjara ngalkula kutju-
patjara wantira putu kurunpa raparingku-
pai. Panya kutjupa tjutangkuya ara nyanga
palunya tjananya wananingi munuya kurunpa
kunpuringkunytja wiya alatjitu.

¹⁰ Kaya tiinta milmilta warkaripai tjuta
putu ngananala tjunguringkupai Godanya
walkuntjikitja. Panya nganana Jesuku
mulamularingkula kutju Godanya rapangku
walkulpai, panya Jesunya nganampa ilura
milkali tjutingu. Kala palulanguru kuka
katira unglynytja wiyangu palumpa
mulamularingkula palunya walkulpai. ¹¹ Panya
kuli kutjupa kuli kutjupa wati tjukurtjara
pulkangku kukaku milkalingka para-kurpilai
ngura milmilpa mulapa panya tiinta unngutja
Godalu nyakula anangu uwankara kura tjuta
palyantjitjanguru kalypangku pungguwiyangu
wantinytjaku. Palu iltjanpaya urilta katira
ngurangka patu nguwanpa kutjalpai kampara
mulururira tjungparingkunytjaku. ¹² Ka
panyaya palu purunpa Jesunya urilta katira
ngurangka patu nguwanpa iluntanu. Palu
paluruu nganampa anga-ilungu nganananya

palumpa milkalingka paltjintjikitja nganana Godala mirangka palya mulapa nyinanytjaku.

¹³ Uwa, Jesunya nganampa pikatjararingu ngurangka urilta patu, kala uti palu purunypa ara nganmanyitja tjuta wantikatira Jesula tjunguringkula nyinama, kalanya tjana palyalta palunya nganannya ananma.

¹⁴ Panya mantangka ngura wiru ngaranytja wiya nganana palula tjungu wanka titutjara nyinanytjaku. Palu nganana panya ngura kutjupaku patara ala-ala nyinanyi, munula ngura nyara palula Godala tjungu titutjara nyinaku.

¹⁵⁻¹⁶ Palulangurula uti Jesulawanungku Godanya rawangku walkunma puntu winkingku, panya Jesunya alatjitu nganampa ilungu. Ka nyura uti watarkurinytja wiyangku palyanyku nyinara anangu kutjupa tjuta kulu alpamilanma intjanungku ungkula. Panya alatjingannyangka Godanya pulkara pukularipai.

¹⁷ Ka nyura uti wanganarangku kulinma anangu panya nyuranya atunymara kanyilpai tjutangka. Panya paluru tjana nyuranya rawangku atunymananyi nyura Jesunya tjukarurungku wanantjaku. Panya Godalu tjananya ungu waraka nyanga palunya, munu tjananya nyanganyi nyuranya wirura kanyintjaku. Ka nyura tjanala wanganarangku kulinma tungunpungkuwiyangku, ka tjana nyuranya pukultu wirura kanyilku. Palu tjin-guru nyura tungunpungkunyangka tjana tjituru-tjitururira nyuranya putu wirura kanyilku.

¹⁸ Palu wanyuya rawangku nganampa Godala tjapinma. Panya nganana palumpa

warka tjukarurungku palyani kunta wiyangku, munula nganana titutjara mukuringanyi tjukaruru palyanyku nyinanytjikitja. ¹⁹ Ka ngayulu nyuranya pulkara ngatjini nyura ngayuku Godala tjapintjaku paluru ngayunya nyuralakutu kuwari nguwanpa malakungku iyantjaku.

Tjanampa Godala Tjapintja

²⁰⁻²¹ Uwa, Mama Godalu anangu tjuta palumpa kalypa nyinanytjaku palyalpai. Munu paluru Mayatja Jesunya pakaltjinganu ilunytjitjanguru. Panya paluru tjapata pulkangku nganannya tjiipi purunypa atunymara kanyilpai. Munu paluru alatjitu walytja puntu winki intjanuringu munu ilura milkali tjutingu nganampa uwankaraku. Ka nyara palulanguru Godalu Jesunya pakaltjinganu milkali tjutinytjitjanguru, ka ara panya Godalu nganmanytju kalkuntjitjalta utiringu, munu titutjara ngaraku wiyaringkunytja wiya. Kana nyurampa tjapini nyanga alatji,

“Mama God, nyanga tjananya nintinma wiru tjuta palyantjaku, panya nyuntu mukuringkunytja uwankara wanganarangku kulira palyantjaku. Ka Mayatja Jesu, nyuntu tjananya kunpunma tjukaruru nyinara Godanya kutju pukulmankunytjaku.”

Alatjina nyurampa tjapilpai. Kala wanyu uwankarangku Jesunya Christanya titutjarangku mirawanima! Uwa, mulapa.

Tjukurpa Malatja

²² Walytja tjuta, tjukurpa nyanga ngayulu nyurampa walkatjunktunytjaya purkaranku palyanyku kulinma. Panya ngayulu alatji walkatjunu nyuranya rapantjikitjanku tjukurpa mutumutu.

²³ Ka nganampa panya malpa Timitjinya tjailanguru pakanu, ka nyura kulinu? Ka tjin-guru paluru ngayula nyangangka warpungkula wirkara tjunguringkunyangka ngali kutjaratu ma-pitjaku nyuranya nyakunytjikitja.

²⁴ Palu nyura tjakultjura anangu panya nyuranya atunymara kanyilpai tjutangka munu Godaku walytja kutjupa uwankarangka kulu, panya nganana tjananya kulini tjanampa pukularira. Ka panya Italinya ngurara tjutangku kulu palu purunypatu nyuranya kulini.

²⁵ Uwa, alatjituna wangkanyi. Ka Godalu nyuranya pukultjunku wirura kanyinma.

Tjukurpa Palya
Portions of the Holy Bible in the Pitjantjatjara
language of Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6